

# ROMAMO ITE CRISTONA HNOTINOMO PABLO ORETAGA RABE

## *Romamo ite creyentiaimo Pablo cartana orede*

<sup>1</sup> Romamo ite creyentiaï, omoï ðine cartana oreðicue. Pablocicue. ¿Nigacino? Jesucristo ðibeimo maijicue. Jusiñamui fetocamieðicue. Ie mare rafuena cue lollena, cuena orede.

<sup>2</sup> Jusiñamuidi naimie facaina lloraini micoriaido bie rafuena jaie llote. Naimaci micoriai iena jaie jiaï cueda. Iemona birui facacabidicai. <sup>3</sup> Bie rafuedi Jusiñamui Jitona llote. Naimie jaie ite usumadi cai illaïma David micori. <sup>4</sup> Naimie Jusiñamui Jitonana uiñoticaï. Jusiñamui Joreñodi siño rafuedo caïna iena uiñotade. Jusiñamui Jito fiollaïllamona, Jusiñamuidi ie Jitona jillotate. Jusiñamui Jitodi Jesucristo. Cai Nama. <sup>5</sup> Caïna duenaïllanona, caïna oretate, naga nairaïaïna naimiena ðnotallena, naimiena naimaci iobitallena. <sup>6</sup> Naimacimona itomoi. Naimiemo omoï duïllena, Jesucristo omoïna jai fetode.

<sup>7</sup> Romamo ite creyentiaï, Jusiñamui isiruiganodomoi. Naimie isoi mareuidinona omoï illena, fetocanodomoi. Cai Moo Jusiñamui, cai Nama Jesucristo ðiga, omoïna duenaite. Iena uiñocana mai omoï jai. Iaimaïaï omoïna uri jai itatatiïaïmaïaï. Iena omoï uiñocana mai omoï jai.

## *Roma ðine Pablo jaiacade*

<sup>8</sup> Diga comini, diga illanuaimo, Jesucristona omoi ñnuana jai fididimaci. Ie jira nano dofoconi omoi facaina Jesucristomo iobillacinona feaacadicue, Jusiñamuimo iena naimie fecallena. <sup>9</sup> Jusiñamuimo cue jñia, omoi ri jñidicue. Jusiñamui iena uiñote. Naimie Jito rafuena cue lluanona, cue comecimona naimiena sedadicue. <sup>10</sup> Jusiñamuimo cue jñia, naimiemo jicadicue, cuena canollena. Naimie jitaia, omoi ñine ja muidomo cue riiticue. Iena jicadicue. <sup>11</sup> Omoina eo cioacaducue. Jusiñamui Joreño uai cuemo illamona, omoi comeciaina ocuiñotaiacaducue. <sup>12</sup> Jesucristona omoi ñnuamona, naimiena cue ñnuamona, coninina cai comeciaina ocuiñotaiticai.

<sup>13</sup> Cue amatiai, diga icaiño omoi ñine jaiacaducue. Iena omoi uiñuana jitaidicue. Jaiacaducue; iadedi nia jainidicue. Cuemona Jesucristo rafuena cacajamona, dajerie jiaie nairaijai jai ñnotimaci. Omoi ñine Jesucristo rafuena lluaiacaducue, iena omoimona dajerie ñnollena. <sup>14</sup> Nana comini ñine Jusiñamui oretagacue. Ie jira griego uaido ñaitinomo Jesucristo rafuena lloiacadicue. Griego uaido ñaññedinomo iena jia lloiacadicue. Abina uiñotinomo iena lloiacadicue. Abina uiñoñedinomo iena jia lloiacadicue. <sup>15</sup> Ie jira omoimo Jesucristo rafuena eo lloiacadicue.

### *Jesucristo rafue siño*

<sup>16</sup> Jesucristo rafueri iobidicue. Naie rafuedi siño. Jusiñamuidi naga iena ñnotinona naimaci jeacinomona jillotate. Judíuaidino nano iena cacadimaci. Ie mei judíuaidino iena jai cacadimaci. <sup>17</sup> Naie rafuemona Jusiñamui caina

feĩñuana uiñotĩcaĩ. Jusiñamui caina marebicaita-jana uiñotĩcaĩ. Naimiena cai ñnuamona iena uiñotĩcaĩ. Jusiñamui facaina lloraima micorĩ jaie cuega: “Jusiñamuina ñnuamona marebicaidimiedĩ Jusiñamui dibeimo ico jaca iite” cuega.

*Comĩni jeacinona fĩnoiadedĩ, dani naimaci muidona*

<sup>18</sup> Nana Jusiñamuina jitaĩñedinodĩ naimie duere finollifue anamo jai itimaci. Iena uiñotĩcaĩ. Jusiñamui caina iena uiñotade. Maraiñede rafue naimaci finuanona, Jusiñamui ie uanaicinona jamaidimaci. <sup>19</sup> Jusiñamui naimacina naimiena uiñotaja muidona, imaci comeciainona Jusiñamui illana uiñotimaci. <sup>20</sup> Enirue finua facaisemona naimie finoca ramona naimie illana uiñotimaci. Naimiena cionidimaci; iadedĩ naimie finoca ramona naimiena uiñotimaci. “Naimiena uiñotimaci” omoi raia, naimiedĩ bu. Naimie uai jaca siñonana uiñotimaci. Ie jira: “Jusiñamuina uiñoñedicaĩ” rainidimaci. <sup>21</sup> Jusiñamui uiñotimaci; iadedĩ naimie uaina ñnoñedimaci. Naimiemo comeciaina facañedimaci. Naimiemo iobillacinona fecañedimaci; iadedĩ ebena comeciaina facacabidimaci. Naimaci comeciain jai tainomo ite isoide. Jai marebificaiñedimaci. <sup>22</sup> “Abina uiñotĩcaĩ” raitimaci; iadedĩ abina uiñoñedimaci. Jamai ebe isoidimaci. <sup>23</sup> Jusiñamui jaca ite. Naimie uai siño. Naimiena sedaacaiñedimaci; iadedĩ jiaie rana sedaacadimaci. Fiodairuide imana eruaide jiraraina finodimaci. Ofomana eruaide jiraraina finodimaci. Ocainana eruaide jiraraina

finodimaci. Jaiona eruaide jiraraina finodimaci. Naie isoide jiraraina sedavidimaci.

<sup>24</sup> Ie jira Jusiñamui naimacina fañonocaide, naimaci jitailla jearede rafuena imaci finollena. Ie mei conini diga eo meirede rafuena finovidimaci.

<sup>25</sup> Jusiñamui ie uanaicinona jitañedimaci. Uanañedicinodo jaidimaci. Jusiñamui finoca rari iobidimaci; iadedi naie rana finodimieri iobiñedimaci. Ero, dani Jusiñamuimo iobillacinona jaca cai fecacabillasa. Uanaicinona lloticue.

<sup>26</sup> Iese naimaci illa jira, naimaci jitailla meirede rafuena finollena, Jusiñamui naimacina fañonocaide. Coniñona aifuedotimaci. <sup>27</sup> Naimaci jitailla jira, conimana aifuedotimaci. Naimaci marañede finoca rafuemonu duere sefuillemona ibana feiñoitimaci.

<sup>28</sup> Jusiñamuina naimaci uiñoiacañena jira, marañede rafuemo naimaci comeciñi facallena, Jusiñamui naimacina fañonocaide. Naimaci finorainiga rafuiaina finocana jaidimaci.

<sup>29</sup> Naga isoide marañedicinona finovidimaci. Naga isoide jearedicinona finovidimaci. Jiaie comini rana nicidovidimaci. Jiaie cominina duere finovidimaci. Jiaima raconi uradoisoidimaci. Cominina jaca meinetimaci. Fuiriruidimaci. Jifuerisoidimaci. Jiaie cominina jeare finovidimaci. Eo ñaillaredimaci. <sup>30</sup> Jiaie comini joreñona ñaioidimaci. Jusiñamuina jaca gaiñedimaci. Cominina jeare ñaioidimaci. Abina iedovidimaci. Abina biriuidimaci. Diga jearede rafuemo comeciñina facavidimaci. Naimaci moo uaina ñnorainidimaci. Naimaci ei uaina ñnorainidimaci. <sup>31</sup> Ebona itimaci.

Naimaci lloga uaina finorainidimaci. Jiaie cominina isiruirainidimaci. Naimacina jiai dueruirainidimaci. Iese jaisoidimaci. Iese nia jaicabidimaci. <sup>32</sup> Jusiñamuidi jaie llote: “Bie isoide rafuena finodino iraimo jaca duere sefuitimaci. Cue illanomo jaca iñeitimaci” llote. Jusiñamui llwana uiñotimaci; iadedi naie rafuena finocana jaidimaci. Iena jiaie comini finoiadedi, iobillanona, “Macai mare iese imaci finua” raitimaci.

## 2

### *Jusiñamuidi maraiñede rafuena finodinona duere finoite*

<sup>1</sup> Ero, omoi judúuaimona damie comecina nibai facade: “Bie isoide maraiñede rafuena finoñedicue. Iena finuamona, jiaie comini Jusiñamuimona duere sefuitimaci. Cue duere sefuiñeiticue” raillamo naimie comecina facade; iadedi naie isoide maraiñede rafuena naimie finua jira, Jusiñamui naimiena jiai duere finoite. <sup>2</sup> Jusiñamuidi uanaicinona uiñuamona, maraiñede rafuena finodimiena duere finoite. Iena uiñoticaí. <sup>3</sup> “Jusiñamui duere finollicino anamona jilloñeitimaci” comecina facadio. Naimacimo o comecina o facaja isoi, naimaci isoi o finua jira, Jusiñamui ona jiai duere finoite. <sup>4</sup> Ona naimie duenaillamona, ona naimie duere finoacaiñellemona, o comecimo iticino marecinona meiduana naimie jitaide. Naimie dibeimo o illana naimie jitaide. Naiena jamaiñeno. <sup>5</sup> O comeci jaiarena jira, o comeci Jusiñamui dibeimo meidoiacaiñedio. Ie jira ico eo duere sefuitio.

Ie riicaillifue mona Jusiñamuidi nana naimiena ñnoñedinona duere finoite. Iena Jusiñamui finoia, Jusiñamuimona mare. <sup>6</sup> Nagamiai imaci finua ille ñnori Jusiñamui naimacina duere finoite. <sup>7</sup> “Mare rafuena finocana jaidino cue illanomo jaca iitimaci” lloite. Naimaci naimie isoi ebire iacania, naimiemona iobillacino naimaci jitaia, naimie illanomo naimaci jaca iacania, iese Jusiñamui lloite. <sup>8</sup> Maraiñede rafuedo jaidino Jusiñamui duere finollicino anamo iitimaci. Dani imaci abina isiruitimaci. Uanaicinona ñnoñedimaci. <sup>9</sup> Jusiñamui naga jeacinona finodimiena eo duere finoite. Judíuai comini ua duere finoite. Judíuaiñedinomo cominina jiai duere finoite; <sup>10</sup> iadedi Jusiñamuidi naga mare rafuedo jaidimiena ebire itataite. Iobitaite. Uri itataite. Judíuaimo iese ua finoite. Judíuaiñedinomo iese jiai finoite, <sup>11</sup> naga nairaina daje isoi naimie finua jira.

<sup>12</sup> Judíuaiñedinodi Moisés micori llogacino anamo iñedimaci; iadedi jeacinona naimaci finua jira, Jusiñamui naimacina duere finoite. Judíuai Moisés micori llogacino anamo itimaci; iadedi iena naimaci ñnoñena jira, jiai jaca daje isoi duere sefuitimaci. <sup>13</sup> Moisés micori llogacinona cacajamona, Jusiñamuimona jaca buna marebicaiñede; iadedi iena ñnuamona marebicaide. <sup>14</sup> Judíuaiñedinodi Moisés micori llogacino anamo iñedimaci; iadedi naimaci comeciai facajamona, marecinona finuana uiñotimaci. Marecinodo jaillana jiai uiñotimaci. <sup>15</sup> Moisés micori llogacino anamo naimaci illa isoi, naimaci comeciaimona marecinona naimaci finoiadedi, iena uiñotimaci. Ie jira

maraiñedicinona naimaci finoiadedi, iena jiai uiñotimaci. <sup>16</sup> Biena llofuecabiticue. Ico Jusiñamui llua jira, Jesucristodi cominimo imaci comeciaino iticinona juez isoi lloite. Maraiñedicinona finouidinomo duere finollicinona lloite. Marecinona finouidinomo duere finollicinona lloñeite.

*Moisés micori llogacinodo judíuai comini raise jaiñedimaci*

<sup>17</sup> Abina iedumona, omoimona damierie raitomoi: “Judíuai imacidicai. Moisés micori llogacino anamo cai illa jira, duere finollicinomona jilloiticaí. Jusiñamui cai diga ite” raitomoi. Iena omoi raillamona, abina iedotomoi.

<sup>18</sup> Naimie jitailla rafuena uiñotomoi. Moisés micori llogacinona omoi uiñuamona, marecinona finuana uiñotomoi. <sup>19</sup> Jusiñamuina uiñoñedinona llofueiacadomoi. Naimiena naimaci uiñoñena jira, jitreñedinomo itimaci isoidimaci. Uanaicinona naimacimo omoi llumona, naimaci comeciaina lligaiñoiacadomoi. Naimacina uanaicinona uiñotaiacadomoi.

<sup>20</sup> Jusiñamuina raise uiñoñedinona llofueiacadomoi. Naimacina abina uiñotaiacadomoi. Naimie rafuena nia raise uiñoñedinona llofueiacadomoi. Moisés micori llogacinomo nana uiñuacino illa jira, naiemo uanaicino illa jira, iese iacadomoi.

<sup>21</sup> Jiaie cominina llofueiacadomoi; iadedi ¿niese omoi comeciaino fueoiacaiñedomoi? “Rana fiñeno” llotomoi; iadedi fiñedomoi. <sup>22</sup> Omoi aiñede riño diga iñenana llotomoi; iadedi ie isoi finodomoi. Jusiñamuina eruaide jiraraina gaiñedomoi; iadedi naie ra illanuaimona naie jiraraina fiñedomoi.

<sup>23</sup> Moisés micori llogacinori abina iedotomoi;

iadedi iena omoi ñnoñena jira, Jusiñamuina jeare finodomoí. <sup>24</sup> Iena Isaías micori jaie cuete: “Omoi muidona judíuaiñedinodi Jusiñamuina jeare ñaitimaci” cuete.

<sup>25</sup> Jusiñamui dibeimo jai omoi illana jaie comini uiñollena, omoi abina detatatomoi. Moisés micori llogacinona omoi ñnoiadedi, omoi abina detatajadi mare; iadedi naicinona omoi ñnoñenia, abina detatañedino isoi jai itomoi. Jusiñamui dibeimo iñedomoi. <sup>26</sup> Moisés micori llogacinona judíuaiñedino ñnoiadedi, naimaci abina detatañenia, Jusiñamuimona naimie dibeimo ite judíuai isoidimaci; iadedi abina detatañedimaci. <sup>27</sup> Moisés micori llogacinuaina uiñotomoi. Omoi abiaina detatatomoi; iadedi Moisés micori llogacinona judíuaiñedinodi ñnua jira, Moisés micori llogacinuai omoi ñnoñena jira, Jusiñamuimona omoi baifemo uaidimaci. <sup>28</sup> Omoi jeiciamona Jusiñamui ua cominiñedomoi. Omoi abiaina detatajamona, Jusiñamui ua cominiñedomoi; <sup>29</sup> iadedi omoi comeciai marena illamona, Jusiñamui ua cominidomoi. Abi detataja jira, Jusiñamui cominiñedomoi; iadedi omoi comeciai marena illa jira, Jusiñamui cominidomoi. Raise naimiena ñnotinodi cominimona iobillacinona feiñuana jitaiñedimaci; iadedi Jusiñamuimona iobillacinona jitaídimaci.

### 3

<sup>1</sup> Bie cartana omoi feiñuanona, iena facallemona, damierie comecina facaite: “Judíuaidicai; ia naiemona, ¿ñiese jaie comini baifemo faiticai? Cai abiaina detataticai; ia naiemona jaca



buena oñedicai”. <sup>2</sup> Ie jira omoimo lloiacadicue: “Judíuaina cai illana eo mare”. Jusiñamuidi dani caimo ie rafuena llote. Jiaie cominimo lloñede. <sup>3</sup> Cai cominimona dajerie Jusiñamui rafuena ñnoñedimaci; iadedi Jusiñamuidi ie lloga rafuena jaca finode. <sup>4</sup> Comini tainona llotimaci; iadedi Jusiñamuidi uanaicinona jaca llote. David micori iena jaie llote:

O lloga uaimona uanaicinona o llouillana uiñoticaí.

O finoca rafuena jiaie comini uaitaia, o dinena jaca anafenodio.

Iena uiñoticaí.

<sup>5</sup> Dane damerie comecina facaite: “Jusiñamuidi mareuidimie. Cai baifemo uaide. Cai marañedicinona cai finuamona caina Jusiñamui jitaia, jiaie cominidi Jusiñamui jaca mareuillana uiñoitimaci. Cai illa muidona Jusiñamuina iese uiñotimaci. Ie muidona naimiedi cai jeacino facaina caina duere finoñena, jiaie cominina naimiena cai uiñotaja jira”. Omoimona iese dajerie comeciaina facadimaci; <sup>6</sup> iadedi iese iñede. Cai jeacino facaina caina duere finoñeniadedi, Jusiñamuidi jiaie cominina jiaí duere finonite.

<sup>7</sup> Taino cue lloia, iena naimie oni dotaia, naimiedi mare rafuena finuana cominidi uiñotimaci. Ie mei naimiemo iobillacinona fecadimaci. Ie muidona Jusiñamui cue jeacino facaina cuena duere finoñena. <sup>8</sup> Omoimona dajerie cuena ñaitimaci: “Bimie raite: ‘Jusiñamui marecinona finuana raise cai uiñollena, marañedicinona finocana cai jailla’”. Iese cue lloñena jira, Jusiñamui naimacina duere finoia, cuemona mare.

*Jeacinona nana cai finodicaí*

<sup>9</sup> Judíuaidicaí; iadedi jeacinona nana comini finua jira, jiaie nairai baifemo faiñedicaí. Judíuaidicaí; iadedi jeacinona finodicaí. Judíuaiñedinodi jeacinona jiaí finodimaci.

<sup>10</sup> Jusiñamui facaina lloraini micoriai iena jaie cuete:

Marebicaidino jaca iñede. Nana comini maraiñedimaci.

<sup>11</sup> Jaca buna Jusiñamuina raise uiñoñedimaci. Naimiena raise uiñoiacaiñedimaci.

<sup>12</sup> Mare rafuedo nana jaiñedimaci. Maraiñedicinona finooidimaci.

Jaca buna marecinona finoñedimaci.

<sup>13</sup> Jeare ñaicabitimaci. Tainona llocabitimaci.

Naimaci ñaiamona diga jearede rafue comuicabide.

<sup>14</sup> Naimaci fuiái eo borede.

<sup>15</sup> Icirillamona jiaie cominina raire meinetimaci.

<sup>16</sup> Nine naimaci jaia, diga maraiñede rafuena comuitatimaci.

<sup>17</sup> Uri illana uiñoñedimaci.

<sup>18</sup> Jusiñamuina jaciruiñedimaci

jaie iese cuete. <sup>19</sup> Jusiñamui facaina lloraini micoriai lloga uaidi naie lloga uai anamo itinomo duide. Naie lloga uai naimaci uiñuamona, dani abi imaci ridolle uai iñede. Nana comini Jusiñamui duere finollicino anamo itimaci. Iena uiñoticaí.

<sup>20</sup> Moisés micori lloga uaina ñnuamona, Jusiñamui jitailla isoi, jaca buna marebicaiñeite; iadedi naie lloga uaina cai uiñuamona, jeacinona cai finuana uiñoticaí.

*Jesucristona cai ñnuamona jillobidicaí*

21 Jusiñamuidi birui caina marebitatajana jai uiñotade. Moisés micori lloga rafuedo iena birui uiñoñedica; iadedi Moisés micori iena jaie llote. Jusiñamui facaina lloraini micoriai iena jiai llotimaci. 22 Jesucristona cai ñnuamona, Jusiñamuidi caina marebicaitate. Nana Jesucristona ñnotinona marebicaitate. Nie isoide cominina cai ia, caina marebicaitallena, caina daje isoi feiñoite. 23 Nana caidi jeacinona finodica. Jusiñamui caina jitailla isoi, marena iñedica. 24 Caina naimie duenailamona, naimie jitailla jira, Cristo Jesúsna cai ñnuamona, caina marebicaitate. 25 Jesucristo nia biñena facaise ite cominimo jeacino facaina Jusiñamuidi ibana oñede. Naimaci jeacino facaina Cristo Jesús fiodaillena, cai facaina naimie fiodaillena, Jusiñamui naimiena oretate. Naimiena birui cai ñnoia, caina duere finoñeite. Jusiñamuina mareuidimiena uiñotica. 26 Naimiena iese oretajamona, Jesúsna ñnotimiena Jusiñamuidi marebicaitaja jira, Jusiñamuina mareuidimiena uiñotica.

27 Cai jeacinomona marena cai illena, buena finoñedica. Ie jira cai finuamona abi iedoñedica. Buena finoñedica; iadedi Jesucristona cai ñnuamona, jillobidica. Ie jira cai finoca rafueri abina iedoñedica. 28 Moisés micori lloga uaina cai ñnuamona, marebicaiñedica; iadedi Jesucristona cai ñnuamona marebicaidica.

29 Jusiñamuidi dani judíuai imaci Mooñede; iadedi naimiedi nana comini imaci Moo. 30 Cai Moodi jaca damiena jira, naimiena naimaci ñnua jira, judíuaina marebicaitate. Naimiena naimaci ñnua jira, judíuaiñedinona jiai marebicaitate. 31 Cai

ñnuamona cai marebicailla jira, Jusiñamui facaina lloraini micoriai jaie lloga uaina caitañedica; iadedi iena ua ñnocana jaidica.

## 4

### *Abraham micorimona fueotica*

<sup>1</sup> Abraham micori rafuena ja ñaiacaducue. Naimie marebicaillafuena omoimo lloiacadicue. <sup>2</sup> Ie finoca rafuemona naimie micori marebicaidena, naimie micori abina iedote; iadedi ie finoca rafuemona naimie micori marebicaifede. Ie jira Jusiñamuimona naimie micori abina iedoicaiñede. <sup>3</sup> Iena Moisés micori jaie cuela: “Jusiñamuina Abraham micori ñnua jira, Jusiñamuidi naimie micorina jeacinona jaca finoñedimiena isoitate. Naimie micorina marebicaitate” cuela. <sup>4</sup> Maijillena buna damie ocuiadedi, ibajana jamai fecañeite; iadedi maijia facaina fecaite. <sup>5</sup> Ero, ie maijiamona jaca bu jeacinona jaca finoñedimiena isoicaiñede. Jusiñamuina naimaci ñnua jira, Jusiñamuidi marañedinona marebicaitate. <sup>6</sup> Bie rafuena David micori jia; jaie cuela:  
Ie maijiamona bu marebicaifena jira, Jusiñamui marebicaitagamiedi iocire iite.

<sup>7</sup> Naimaci marañedinona Jusiñamui dotajamona, iocire iitimaci.  
Jusiñamui naimaci jeacinona dane abido ietañeite.

<sup>8</sup> Naie jeacinomo Jusiñamuidi comecina dane facañeite.  
Naimiedi jai feitaite.  
Ie jira iocire iitimaci.

<sup>9</sup> Dani abina detatatinno iocire illena lloñede; ia abina detatañedinomo iena jiaí lloste. Jusiñamuina Abraham micorí ñnua jira, Jusiñamui naimiena marebicaitate. <sup>10</sup> Naimie micorí abina nia detatañenia, naimie micorí marebicaide. <sup>11</sup> Naimie micorí marebicailla mei, Jusiñamui ñnena Abraham micorímo abí detatajana lloste. Abraham micorí ie abina detatajamona, Jusiñamuina naimie micorí ñnuana uiñotícaí. Ie abina detatajamona, judío imiena jai jaide; iadedí Jusiñamuina ñnuamona, naimie micorí marebicaide. Ie jira Abraham micorídí nana Jusiñamuina ñnotino moo. Nana comíni abiaína detatañedimaci; iadedí naimaci ñnua jira, Jusiñamui naimacína marebicaitate. <sup>12</sup> Cai comíni abiaína detatatimaci; iadedí cai moo Abraham micorí isoi naimaci ñnua jira, Abraham micorí isoi marebicaídímaci. Ie jira Abraham micorí nana naimaci moo.

*Abraham micorí ñnuamona, Jusiñamui lloga uaidí suide*

<sup>13</sup> Abraham micorímo Jusiñamuidí: “Nana enírue omo iitícue” lloste. “O uruiaímo iena jiaí iitícue” lloste. Moisés micorí llogacínona Abraham micorí ñnua jira, iese Jusiñamui lloñede; iadedí Jusiñamui lloga uaina Abraham micorí ñnua jira, iese Jusiñamui lloste. Abraham micorí ñnua jira, Jusiñamuidí naimiena marebicaitate. <sup>14</sup> Moisés micorí lloga uaina ñnotinomo: “Nana enírueña omoímo iitícue” Jusiñamuidí llotena, Jusiñamuina ñnotino tainona ñnotimaci. Jusiñamui lloga uai jiaí jai saide; iadedí iese iñede. Dani naimiena ñnotinomo: “Nana enírueña omoímo iitícue” lloste. <sup>15</sup> Moisés micorí lloga uaina naimaci

raise #noñenia, Moisés micorí lloga uaido jaidino Jusiñamui rícaillifue anamo itimaci; iadedi Moisés micorí lloga uai iñedena, Jusiñamuimona buna duere sefuiñeite.

<sup>16</sup> “Eniruena omoimo iitícue” naimiena #notinomo Jusiñamuidi llote. Duenaillamona llote. Nana Abraham uruiaí micoriaímo iena llote. Dani Moisés micorí lloga uaido jaidinomo lloñede; iadedi Abraham isoi #notinomo jiaí llote. Abraham micorí isoi cai jailla jira, naimiedi cai moo. <sup>17</sup> Jusiñamui iena jaie llote: “Ona diga nairai imaci moona jai itataitícue” llote. Jusiñamui fiodaitinona jilloitarede. Nia iñede rana ie uaido jiaí comuitate. Ie jira Jusiñamui Abraham micorímo llua isoi, suide. Jai fiodaitino illa isoi Abraham micorí abi illa jira, Jusiñamui naimie abina mairitate. Ie ai oiniñomo urue comuillena llote.

<sup>18</sup> Jusiñamui Abraham micorímo jiaí llote: “Ailluena uruiaí omo iite. Diga nairai omona jebuite” llote. Abraham micorídi naie #norainiga rafuena #note. <sup>19</sup> Jaca #note; iadedi cien años naimie micorímo illamona, naimie jai eeiroma. Naimie micorí aidi, Sara micorídi, oiniñona jira, naiñaiño uruedi comuiñede. <sup>20</sup> Abraham micorídi Jusiñamui llua #note. #nocana jaillano, iobillacinona Jusiñamuimo fecade. <sup>21</sup> Abraham micorídi Jusiñamui lloga uaina finuana eo #note. <sup>22</sup> Ie jira Jusiñamui naimiena marebicaitate.

<sup>23</sup> Naie rafue jaie cueda; iadedi dama Abraham micorímo duiñede; <sup>24-25</sup> iadedi caimo jiaí duide. Jusiñamuina #notinona marebicaitate. Cai Nama Jesús fiodaillamona, Jusiñamuidi naimiena

jillotate. Cai jeacino facaina fiodaite. Caina marebicaillena, naimiena jai jillotate.

## 5

### *Jai cai marebicaidicai*

<sup>1</sup> Jusiñamuina cai inuamona cai marebicailla jira, Jusiñamui diga uri iticai. Cai Nama Jesucristo finoca rafue muidona, Jusiñamui diga uri iticai. <sup>2</sup> Jesucristo muidona Jusiñamui caina duenaillamona, caina marebicaitate. Naimie ebirena isoi cai illemo caimare ocuridicai; <sup>3</sup> iadedi duere cai sefuialedi, jiai iobidicai. Duere sefuillamona, cai comeciai ocuiñocana cai jaillana uifnoticai. <sup>4</sup> Cai comeciai ocuiñuamona facacifidicai. Facacifillamona, Jusiñamuimo ocuridicai. <sup>5</sup> Jusiñamui caina isiruilla jira, tainomo ocuriñeiticai. Ie Joreña caimo fecade. Ie Joreño cai comeciaino illa jira, ie Joreño Jusiñamuidi caina naimie caina isiruillana uifnotade.

<sup>6</sup> Cai jeacinomona dani jillonidicaino, Cristo cairi fiodaite. Maraiñedicai; iadedi naie facaiseconi cairi fiodaite. <sup>7</sup> Maraiñedimie facaina caimona jaca buna fiolaiacaiñede. Caimona nibai damie maremie facaina fiodaite; iadedi nana comini iese fiolaiacaiñedimaci. Maraiñedimie facaina jaca buna fiolaiacaiñede; <sup>8</sup> iadedi nia maraiñedicaino, Jusiñamui caina isiruillamona, Cristo cairi fiodaite. <sup>9</sup> Cristo cairi fiollaillamona, jai marebicaidicai. Ie muidona Jusiñamui caina duere finuacinomona Cristodi caina jillotaite. <sup>10</sup> Cai dinena Jusiñamuina cai enoilla facaiseconi naimie Jito cairi fiolla muidona, ie Jito jillua muidona, Jusiñamui caina jai nabaide. Naimie caina nabailla jira, cai ico

jilloillena raise uiñoticaí. <sup>11</sup> Cai Nama Jesucristo muidona, Jusiñamui iobidicaí. Cristo muidona Jusiñamui diga uri iticaí.

*Adán micori finoca rafue*

<sup>12</sup> Bie rafue jai suide. Adán micori jeacinona finuamona, nana caimo jeacinodi jai comuide. Jeacino caimo illa muidona, cai jeacino ite diga nana fiodaicana jaidicaí. <sup>13</sup> Moisés micori llogacino nia iñenia, jeacinona finodimaci; iadedi Moisés micori llogacino nia iñenia, Jusiñamuidi jeacino facaina ibana oñede. <sup>14</sup> Moisés micori llogacino nia iñenia, Adán micori facaisemona Moisés micori facaisemo naimaci jeacino ite diga nana comini fiodaicana jaidimaci. Adán micori isoi jeacinona finoñedimaci; iadedi fiodaicana jaidimaci. Adán micoridi Cristo isoiñede. Adán micori finoca rafuemona jeacino comuide. Cristo finoca rafuemona Jusiñamui cai jeacinona oni dotade.

<sup>15</sup> Adán micori finoca rafuedi Jusiñamui finoca rafue isoiñede. Adán finoca rafuemona cai jeacino ite diga nana cai fiodaicana jaidicaí; iadedi Jusiñamui finoca rafue Adán micori finoca rafue baifemo faite. Jusiñamui jitailla jira, caina naimie duenailamona, cai dine Jesucristona orede, nana cai jilloillena. <sup>16</sup> Dama Adán micori jeacinona finuamona, Jusiñamuidi nana caina duere finollicino anamo itatate; iadedi Jesucristo fiodaillamona, Jusiñamui jitailla jira, caina marebicaitate. Ailluena jeacinona finodicaí; iadedi marebicaidicaí. <sup>17</sup> Dama Adán micori jeacinona finuamona, cai jeacino ite



diga nana cai fiodaicana jaidicai. Jusiñamui caina eo duenaillamona, Jusiñamui caina marebicaillamona, dama Jesucristo muidona, Jusiñamui diga jaca iiticai.

<sup>18</sup> Dama Adán micori muidona, nana comini duere finollicino anamo itimaci; iadedi dama Jesucristo finoca mare rafuemona Jusiñamui diga naimaci jaca illena, nana comini marebicairedimaci. <sup>19</sup> Adán micori Jusiñamuina ñnoñenamona, nana comini jeacinona finodimaci. Jesucristo Jusiñamuina ñnuamona, ailluena comini marebicaitimaci.

<sup>20</sup> Jusiñamui Moisés micorimo rafuena llote. Iena comini ñnoñenamona, diga jeacinona naimaci finuana uiñotimaci. Jeacinona finocana jaidimaci; iadedi Jusiñamuidi naimacina eo duenaite.

<sup>21</sup> Jeacino anamo jaie nana cai illa jira, cai jeacino ite diga fiodaicana jaidicai; iadedi Jusiñamui duenaillacino anamo birui iticai. Ie jira cai marebicaillamona, cai Nama Jesucristo muidona, Jusiñamui diga jaca iiticai.

## 6

*Jesucristomo cai duillamona, jeacino anamo jai iñedicai*

<sup>1</sup> Jeacino anamo jai iñedicai; iadedi omoimona damerie comecina facaite: “Naga icaiño jeacino cai finoia, caina Jusiñamui duenaillamona, cai jeacinona oni dotade. Naimie caina duenaicabillana raise cai uiñollena, jeacino eo finocana jaiticai. Iemona cai jeacinona oni dotajamona, naimie caina duenaillana eo raise uiñoiticai”.

<sup>2</sup> Iese comecina facaño. Jeacino anamo jai

cai iñena jira, jeacinona finocana cai jaiñena. <sup>3</sup> Biena uiñotomoi. Cristo Jesús díbeimo cai illa-mona, nana caidi bautizagacai. Cristo fodailla jira, cai comeciáimo ite jearedicino anamo jai iñedicai. <sup>4</sup> Cristo fodailla jira, raiafomo naimiena jonetimaci. Cristo fodaillamona ie Moo uaido jillode. Naimie díbeimo cai illamona, cai jeacino anamona jillodícai. Cai comeciáimo jiaie rafue birui illa jira, jiaie rafuedo jai jaidícai.

<sup>5</sup> Cristo fodaite; iadedi naiemona jillode. Naimie díbeimo cai illanona, cai comeciáimo ite jearedicino anamona cai jillua jira, Cristo ie mare rafue anamo birui itícai. <sup>6</sup> Cristo fodailla jira, cai comeciáimo ite jearedicino anamo jai iñedicai. Caimo jai jainaiñena jira, jeacino finocana cai jaiñena. <sup>7</sup> Jeacino anamo jai cai iñena jira, jeacinona finocana cai jaiñena. <sup>8</sup> Cristo fodaite; iadedi jillode. Naimie fodailla jira, cai jearedicino anamo jai iñedicai. Naimie jillua jira, jiaie rafuedo birui jaidícai. <sup>9</sup> Fodaillamona Cristo jillua jira, naimiedi dane fodaiñeite. Naimie fodaitemo, cai jeacino facaina naimiedi jai fodaite. Jai dane fodaiñeite. <sup>10</sup> Jeacino facaina jeacinona oni dotallena, naimie dacaiño fodaite; iadedi ie Moona jaca iobitajanona, naimie ie Moo díbeimo jaca iite. <sup>11</sup> Ie jira jeacino anamo iñenanomo omoi comeciaina faca. Cristo Jesús díbeimo jai omoi illanona, Jusiñamui jitailla rafuena finollemo omoi comeciaina faca.

<sup>12</sup> Jeacinona finocana jaiñeno. Omoi comeciái jeacinona finoacania, iena iñoño. <sup>13</sup> Jeacinona omoi finoñellena, omoi comeciaina ocuiño. Mare naimie jitaillacinona omoi finollena, Jusiñamuina

ñno. Jeacino anamo jaie omoï illa jira, naimiemo omoï nia duiñena jira, Jusiñamuimona fiodaitino isoidomoï; iadedi jeacino anamo birui omoï iñena jira, naimiemo omoï jai duilla jira, Jusiñamuimona fiodaillamona jai jillodino isoidomoï. Jaie naimiemo duiñedomoï; ia birui naimiemo jai duidomoï. <sup>14</sup> Moisés llogacínuaï anamo omoï jai iñena jira, jeacino anamo jai iñedomoï. Jeacinona finocana omoï jaiñellena, Moisés micori llogacínodo jaiñedomoï; iadedi jeacino omoï finoñellena, omoïna Jusiñamui duenaillamona, naimie omoïna birui canocabide.

*Patrón anamo itinomona cai fueolle*

<sup>15</sup> Moisés micori llogacino anamo jai iñedicaï; iadedi omoïmona damierie comecina facade: “Moisés micori llogacino anamo cai iñenamona, jeacino cai finoia, Jusiñamui caina duere finoñeite”. Iese comecina facañeno. Jeacinona finocana cai jaiñena. <sup>16</sup> Biena uiñoticaï. Patrón anamo bu ia, ie patrón comeci jitailla rana finode. Ie ocuica rana ñnote. Ie isoide. Jeacino anamo omoï ia, jeacinona finocana jaidomoï. Jeacino omoï finuamona omoï jeacino ite diga fiodaicana jaidomoï. Ie jira Jusiñamui illanomo ico iñeitomoï. Jusiñamui anamo omoï ia, Jusiñamui jitailla rafuena finocana jaidomoï. Naimie illanomo ico iitomoi. <sup>17</sup> Jeacino anamo jaie itomoï. Iemei omoïmo jiaie comini Jesucristo rafuena jai llotimaci. Iena cacajanona, iena raise ñnotomoï. Ie jira Jusiñamuimo iobillacinona fecadicue. <sup>18</sup> Jeacino anamona jai jillobillamona, marecinona finocana jai jaidomoï.

19 Cue lluana omoï raise cacaillena, bie isoide rafuena lloticue. Omoï comeciaï raila jira, jeacinona navui finodomoï. Maraiñedicinona finocana navui jaidomoï. Cristo dibeimo omoï jai illa muidona, marecinona omoï finocana birui mai omoï jai. Iese omoï jaillamona, omoï comeciaï Jusiñamui jitailla isoi marena iitomoï.

20 Jeacino anamo navui omoï ia, Jusiñamui jitailla isoi, marecinona finoñedomoï. 21 Jeacinona navui omoï finuamona mare rafuena oñedomoï. Ie jira iena birui meiruitomoï. Jeacinona finocabidino fiodaillamona, Jusiñamui illanomo ico iñeitimaci. 22 Jeacino anamona jai jillobidomoï. Jusiñamui anamo omoï jai illa jira, naimie ocuica rafuena finodomoï. Iena omoï finuamona, Jusiñamui jitailla isoi, marecinona finocana jaitomoï. Ja muidomo naimie diga iitomoï. 23 Jeacinona finocana omoï jaia, omoï jeacino ite diga fiodaitomoï. Jusiñamui illanomo ico iñeitomoï; iadedi cai Nama Jesucristona omoï inuamona, Jusiñamuidi omoïna jaca itataite. Naimie illanomo ico iitomoï.

## 7

### *Inirede riñomona cai fueolle*

1 Cue amatiaï, Moisés micori llogacinuaina uiñotomoï; iadedi iena nia raise cacaiñedomoï. Ie fiodailla mei, jaca buna Moisés micori llogacinuai anamo iñede. Ie fiodailla mei, jai iñena jira, nainomo duiñede. 2 Ie isoide. Nana naimie ille dinori, inirede riño ie inimo duide. Iese Moisés micori jaie llote. Ie ini fiodailla mei, ie inimo jai duiñede. Naimie anamo naiñaiño jai

iñena jira, jiaimiena naiñaiño oia, ie inina illena, Jusiñamuimona mare. <sup>3</sup> Ie ini nia fioidañenia, jiaimie diga naiñaiño ia, ie ini abimo jeacinona jai finode, Moisés micori lloga uai naiñaiño inoñena jira. Ie ini fiodailla mei, naimie anamo naiñaiño jai iñena jira, jiaimiena ie inino naiñaiño oia, jeacinona jai finoñede.

<sup>4</sup> Ie isoide. Cristo fiodailla jira, Moisés micori llogacinuai anamo jai iñedicaí. Iemo jai duiñedicaí. Ie jira Cristomo jai duidicaí. Jusiñamui jitailla rafuena finocana cai jaillena, fiodaillamona Cristo jai jillode. <sup>5</sup> Jusiñamuina nia cai inoñenia, cai jitailla rafuena finocana jaidicaí. Moisés micori llogacinona uiñoticaí; ia cai marañede jitailla rafuena finocana jaidicaí. Cai jeacino ite diga fiodaicana jaidicaí; <sup>6</sup> ia Moisés micori llogacino jai saide. Caímo jai duiñede. Navui ie anamo iticaí; iadedi birui ie anamo jai iñedicaí. Jusiñamuina cai sedajamona, Jusiñamui Joreño rafuedo jai jaidicaí. Moisés micori ciegafuiaido jai jaiñedicaí.

*Cue comecimo ite marañedicino*

<sup>7</sup> “Moisés micori llogacino marañede” lloñeiticaí; iadedi naie llogacino iñedena, jeacinona uiñoñedicue. Jiaimiemo ite rana cue niciduanana marañenana jaie uiñoñedicue. Moisés micori jaie llote: “Jiaimiemo ite rana nicidoñeno” llote. Ie jira naiemona niciduanana marañenana uiñotice. <sup>8</sup> Naie llogacino muidona cue comeci jeacinona finoacade. Ie muidona rana nicidotice. Naie llogacino iñedena, jeacino finuana uiñoiacaiñedicaí. Naie llogacino iñedena, jeacino anamo iñedicaí. <sup>9</sup> Moisés micori llogacinona nia cue uiñoñenia, caímare uri itice. Naiena cue uiñuamona,

jeacino cue finuana uiñoticue. Ico Jusiñamui diga cue iñenana uiñoticue. <sup>10</sup> Nano cue comecina facadicue: “Naiedo cue jaillamona, Jusiñamui diga ico jaca iiticue”. Iese cue comecina facadicue; iadedi naie llogacinona cue uiñuamona, Jusiñamui dibeimo cuena jaca itatañede. <sup>11</sup> Naie llogacino muidona cue comeci jeacinona finoacana jira, cue jitailla rafuena oñedicue. Ico Jusiñamui diga jaca cue illena oñedicue; iadedi duere cue sefullicinona oticue. Naimie dibeimo Moisés micori llogacino cuena itatañede; ia naimie dibeimona cuena itatate.

<sup>12</sup> Iese ite; iadedi Moisés micori llogacinodi mare. Jusiñamuimona ite. <sup>13</sup> Naie llogacino mare. Naie rafue muidona fiodaiñeticue; ia jeacino muidona fiodaiticue. Jeacinona cue finua jira, Jusiñamui illanomo ico jaca iñeticue. Naie mare llogacinomona jeacino cue finuana eo maraiñenana uiñoticue.

<sup>14</sup> Jusiñamui Joreño Moisés micorina naie llogacinona cuetatate. Ie jira naicino mare; iadedi cue jitailla rafuena cue finua jira, cuemo jeacino illa jira, jeacino finoraimana iticue. <sup>15</sup> Cue finua rafuena raise uiñoñedicue, cue mare jitailla rafuena cue finoñena jira. Cue gaiñena maraiñede rafuena finocabidicue. <sup>16</sup> Cue maraiñede finoacaiñega rafuena cue finoiade, Moisés micori llogacino marenana uiñoticue. <sup>17</sup> Cue comeci iena dama finoñede; iadedi cue comecimo ite jeacino cuena finotate. <sup>18</sup> Cue comecimo marecino iñede. Mare rafuena finoacadicue; iadedi iena finonidicue. <sup>19</sup> Cue mare finoacaga rafuena finoñedicue; iadedi cue maraiñede finoacaiñega

rafuena finodícue. <sup>20</sup> Cue finoacaiñega rafue cue finoiade, cue comeci iena dama finoñede; iadedi cue comecimo ite jeacino cuena iena finotate. <sup>21</sup> Biese cuemo suicabide. Mare rafuena cue finoacaniadedi, jeacinona finocabidícue. <sup>22</sup> Cue comeci Jusiñamui lloga uaina gaide; <sup>23</sup> iadedi cue comecimo maraiñede rafuena illana uiñoticue. Cue comecina namataacade. Cuena jeacinona finotaiacade.

<sup>24-25</sup> Eo dueredícue. Jusiñamui lloga uaina cue comecimona finoacadícue; iadedi cue comecimo ite maraiñede rafue cuena jeacinona finotaiacade. Jeacino finocana cue jaia, duere sefuitícue. Jusiñamui illanomo ico jaca iñeítícue. Naiemona jaca buna cuena jillobitañede. Dama Jusiñamui cuena jillotaite, cai Nama Jesucristo muidona. Ie jira Jusiñamuimo cue iobicabillasa.

## 8

### *Jusiñamui Joreño cai comeciaina namatacana cai jailla*

<sup>1</sup> Cristo Jesúsomo duidinodícai. Ie jira Jusiñamuidi caina duere finoñeite. <sup>2</sup> Jeacino anamo jai cai iñena jira, caina duere finoñeite. Jeacinona cai finuamona, Jusiñamui illanomo ico jaca iñeítícai. Duere sefuitícai; iadedi naiemona Jusiñamui Joreño caina jai jillotate. Jesucirstomo cai duillanona, caina jaca itataite. <sup>3</sup> Moisés micorí llogacinona cai raise iñoñena jira, jeacinomona daní jillonidícai. Ie jira Jusiñamuidi ie Jitona orede, iimana naimie jaillena. Cai isoi naimie jaide; iadedi naimiedi jeacinona finoñede. Jeacinona finorainidícai. Cai jeacino facaina fiodaillena,

naimiena orede. Naimie uaidi cai jeacinona anafefitate. Ie jira jeacino anamona jai caina jillotate. <sup>4</sup> Iese finode, cai marena illena, Moisés micori llogacino llua isoi. Ie jira cai comecimo ite maraiñede jitailla rafuedo jai jaiñedica; iadedi Jusiñamui Joreño jitailla rafuedo jai jaidica.

<sup>5</sup> Cai comecimo ite maraiñede jitaillacinodo cai jaiadedi, naiemo cai comeciaina facadica. Iena finodica; iadedi Jusiñamui Joreño jitailla rafuedo cai jaiadedi, iemo cai comeciaina facadica. Naimie jitailla rafuena finodica. <sup>6</sup> Maraiñede jitaillicinomo comeciaina facacabidino Jusiñamui diga ico jaca iñeitimaci; iadedi Jusiñamui Joreño jitailla rafuedo jaidino Jusiñamui diga jaca iitimaci. Jai jaca uri iitimaci. <sup>7</sup> Jiano Jusiñamuina enoidimaci. Jusiñamui lloga uaina jitaiñedimaci. Iena ñnonidimaci. <sup>8</sup> Iese itino Jusiñamuina iobitanidimaci.

<sup>9</sup> Iese iñedomo; iadedi Jusiñamui Joreño jai duidomo. Naimie omoimo ite. Bumo Jusiñamui Joreño iñenia, Cristomo nia duiñede. <sup>10</sup> Jeacinona omo finua jira, fiadaitomo; iadedi Cristo omoimo illa jira, omo joreñua; Jusiñamui illanomo jaca iitimaci, Jusiñamui omoina marebicaitaja jira. <sup>11</sup> Cristo Jesús fiadailamona, Jusiñamuidi naimiena jillotate. Omoimo ie Joreño illa jira, omo fiadaide, Jusiñamuidi ie Joreño uaido omo abiaina jai jillotaite.

<sup>12</sup> Cue amatia, iese caimo suite. Ie jira cai comeciaino ite maraiñedecinodo cai jaiñelli. <sup>13</sup> Naicinodo cai jaia, Jusiñamui illanomo ico jaca iñeitica; iadedi Jusiñamui Joreñodi caina



canuamona, naicino anamona cai jilluanona, Jusiñamui illanomo ico jaca iiticaí.

14 Nana Jusiñamui Joreño namatadinodi Jusiñamui uruiaí. 15 Jusiñamui Joreñoa feiñoñedomoi, naimiena omoi jaciruillena; iadedi Jusiñamui uruiaína omoi jaillena, naimiena feiñotomoi. Duere sefuillacinona navui jaciruitomoi; iadedi birui: “Cai Moo” raillanona, Jusiñamuina uaidotomoi. Ie jira naimiena jai jaciruiñedomoi. 16 Cai comeciaina Jusiñamui Joreño uiñotajamona, cai comeciáimona Jusiñamui uruiaídicaína jai uiñoticaí. 17 Naimie uruiaídicaína jira, ie uruiaímo fecaacalle ra caímo jai duide, Cristomo jai duilla isoi. Naimie díbeimo cai illanona, Cristo isoi cai duere sefuilla jira, naimie isoi ie Moo illanomo ico iiticaí.

18 Biena uiñoticue. Bene birui duere sefuidicaí; iadedi iemo cai comeciaina cai facañena, monamo ico eo marena jaca cai illena jira. 19 Iese cai illemo nana Jusiñamui finoca radi iocire birui ocuiridimaci. 20 Nana eniruemo ite Jusiñamui finoca radi mare; iadedi Adán micori jeacino finua jira, Jusiñamui llua jira, naimaci faidobidimaci. Iese suide; iadedi ico dane marena naimaci illemo ocuiridimaci, 21 naimaci rifaillamona ico naimaci jillua jira. Ie mei Jusiñamui uruiaídicaína isoi marena iitimaci. Dane fiódaiñeitimaci. 22 Biena uiñoticaí. Nana Jusiñamui finoca radi danomo eo duere sefuicana nia jaidimaci. Marena illemo nia ocuiridimaci. 23 Daní naimaci duere sefuicana jaidimaci; iadedi jiai duere sefuidicaí. Jusiñamuidi ie Joreño caímo fecaí jira, ico cai marena illena uiñoticaí. Monamo Jusiñamui uruiaína ico

caï illemo ocuiridicai. Cai fiodaia, fiodaillamona  
caï abiaïna jillotaite. Jiaïfo eruaite caï abiaïmo  
meidollemo ocuiridicai. Ie mei caï abiaï dane  
fiodaïñeitimaci. <sup>24</sup> Naiemo caï ocuirillamona, caï  
jeacinomona navui jillobidicai. Bumo ie jitailla  
ra ia, iemo naimie ocuirinède. Ie feiñoñega ramo  
ocuiride. Ie isoidemo ocuiridicai. <sup>25</sup> Caïmo suiñede  
rafuemo caï ocuirilla jira, iemo fecuise ocuiridicai.

<sup>26</sup> Birui duere caï sefuia, ico marena caï illemo  
ocuiridicai. Jusiñamui Joreño caina jiaï can-  
ode. Jusiñamuimo caï jiaï, naimiemo caï jicanua  
rafuena caï raise uiñoñenia, ie Joreño caï fa-  
caina ñaite. Naimiedi caï jino botanide uaina  
Jusiñamuimo llote. <sup>27</sup> Jusiñamui caï comeciaina  
uiñote. Naimie jitaillacinona ie Joreño jiaï jira, iena  
uiñote. Jusiñamui cominidicai. Ie Joreño caï facaina  
ñaïana cacade.

### *Jusiñamui caina isiruite*

<sup>28</sup> Jusiñamuina isiruitinodicai. Naimie jitailla  
jira, naimie caina fetode. Jusiñamuidi caïmo suide  
rafuena marena suicana jaitate. Iena uiñotici.

<sup>29</sup> Caina isiruillanona, caina fetode. Nano dofo-  
conimona caina naimie Jito isoi caï illena itatate.  
Naimie Jitodi caï ama doforamiena. <sup>30</sup> Caina iese  
jaie itatajamona, birui caina uaidote. Caina uaidu-  
anona, caina jeacinona jaca finoñedino jai isoitate.  
Caina jeacinona jaca finoñedino jai isoitajamona,  
naimie illanomo ico caï ia, ebire iitici.

<sup>31</sup> Iese caina itataja jira, Jusiñamuidi caï facaina  
illa jira, bu caï facaina iñellena, damamai iesedici.

<sup>32</sup> Jusiñamuidi ie Jitona duere sefuillamona jil-  
lotañede; iadedi namie jitailla jira, caï facaina  
ie Jitona orede, caïri fiodaillena. Ie muidona

naimie dibeimo marena cai ille rafuena caimo jiai iite. <sup>33</sup> Jeacinona navui finodica; iadedi Jusiñamuidi caina jeacinona jaca finoñedino jai isoitaja jira, Jusiñamui fetocanodicaina jira, jaca buna cai jeacino facaina naimiemo llogidoñeite. <sup>34</sup> Ie jira cai jeacino facaina jaca buna caina duere finotañeite. Cristo Jesús jaie fiodaite; iadedi fiodaillamona naimie jillode. Jusiñamui beicimo naimiedi birui ite. Cai facaina naimie ñaite. <sup>35</sup> Cristo caina isiruite. Jaca buna Cristo caina isiruillacinona baironide. Jiaie comini duere caina finoa, caina jeare finoa, aime cai guia, cai iniroinia, jacirede rafue caimo ia, jiaie comini caina meineia, Cristo caina nia isiruite. <sup>36</sup> Iena Jusiñamui facaina lloraima micori jaie cuega:

Jusiñamui muidona caina jaca meinetimaci, mercadomo toica llaudaiai fallena illa isoi cuega. <sup>37</sup> Cristo caina isiruilla jira, caina naimie canuamona, naga bie isoide rafue caimo sua, cai comeciai ocuiñocana cai jailla. <sup>38</sup> Jusiñamui caina isiruite. Naimiemona jaca budi caina baironide. Cai fiodaia, cai nia ia, Jusiñamui caina nia isiruite. Jusiñamui jaienisaidi, Taifedi, Janabadi Jusiñamui isiruillacinomona caina baironidimaci. Birui diga isoide rafue caimo suide; iadedi Jusiñamui caina nia isiruite. Ico diga isoide rafue caimo sua, Jusiñamui caina nia jaca isiruite. Jaca buna ie uaido Jusiñamui isiruillacinomona caina baironide. <sup>39</sup> Monamo ite radi Jusiñamui isiruillacinomona caina baironide. Eniruemo ite radi Jusiñamui isiruillacinomona caina baironide. Nana Jusiñamui finoca radi Jusiñamui isiruillacinomona caina baironide. Cai

Nama Cristo Jesúmo cai duilla jira, Jusiñamui caina isiruillana uiñoticaí.

## 9

### *Jusiñamuidi judíuai railla cominina fetode*

<sup>1-2</sup> Jiaie rafuena nia lloiticue. Cue comecidi eo sunaite. Cristomo cue duilla jira, tainona lloñedicue. Jusiñamui Joreño cue comecina uiñotajamona, iena uiñoticue. Cue cominiri sunaiticue. <sup>3</sup> Cue comini Cristo rafuena ñinoiacañedimaci. Ie muidona Jusiñamui riicaillifue anamo birui itimaci. Naiemona naimaci jilloillena, naimaci duere sefuillicino ifomo cue iticuedena, cuemona mare. Naimacidi cue amatiái. <sup>4</sup> Israel railla cominidimaci. Jiaicidi judíuai railla cominidimaci. Jusiñamuidi naimacina fetode, ie uruiaina. Jusiñamui siño finoca rafuena ciodimaci. Iena naimaci ñnollena, Moisés micorimo Jusiñamuidi rafuena jiaí llote. Naimiena sedallena jiaí llote. Naimaci dine naimaci jilloitaraimana oretallena jiaí llote. <sup>5</sup> Naimaci jaiagaidi Abraham micori, Isaac micori, Jacob micori. Naimacimona comuide nairaimona Cristodi comuide. Naimiedi Jusiñamui. Nana rana naimie anamo ite. Naimieri jaca cai iobicabillasa. Iena jitaidicue.

<sup>6</sup> Cai cominimo Jusiñamuidi ie uaina llote; iadedi nana cai comini iena ñnoñena jira: “Jusiñamui ie lloga uaina finoñede” raiñeiticaí. Jusiñamuina naimaci raise ñnoñena muidona, nana Israel micorimona comuide cominidi Jusiñamuimo duiñedimaci. <sup>7</sup> Nana Abraham micorimona comuidinodi naimiemo duiñedimaci. Jusiñamui

iena jaie llote: “Dama Isaacmona comuidinodi ua Abraham uruiaí”. <sup>8</sup> Naie llumona nana Abraham micorimona comuidinona ie uruiaíñenana uinotícaí. Jusiñamui lloga uaina inotinodi naimie ua uruiaí. <sup>9</sup> Jusiñamuidi Abraham micorimo jaie llote: “Jiaie año bie facaiseconi o dine abido biitícue. Naie facaiseconi o ai Saradi jitona jocoite” llote. Ie mei iese suide.

<sup>10</sup> Ie mei Isaac micoridi Rebeca micorina ote, naimie aina. Ie mei naiñaiño micoridi gorasana iaímaiaí micorina jocode. Nano doforamiedi Esaú micori. Jiaimiedi Jacob micori. <sup>11-13</sup> Naiñaiño micori nia jocoñenia, Jusiñamuidi naiñaiño micorimo llote: “Nano doforamie ie ama anamo jaca iite” llote. Jusiñamui facaina lloraima micori Jusiñamui lluaña jiaí cuete: “Jusiñamui llote: ‘Jacobna eo isiruitícue; iadedi Esaúna janore isiruitícue’ llote”. Naie iaímaiaí micori nia jeiciñenia, iaímaiaí micori marecinona nia finoñenia, iaímaiaí micori maraiñedicinona nia finoñenia, Jusiñamuidi iaímaiaí micorina iese llote. Ie finoca rafuemoná Jacob micorina fetone; iadedi Jusiñamui jitailla jira, Jacob micorina fetode.

<sup>14</sup> “Jusiñamuidi dama Jacob micorina fetuana maraiñede” raiñeitícaí. Jusiñamuidi maraiñedicinona jaca finoñede. <sup>15</sup> Jusiñamui bie isoide rafuena Moisés micorimo llote: “Cue dinena cue jitaillanona duenaitícue; ia cue dinena cue jitaíñenanona duenaiñeitícue” llote. <sup>16</sup> Comini naimiena jitaillamona, Jusiñamui naimacina duenaiñede. Naimaci rafue finuamona, naimacina duenaiñede; iadedi naimie jitailla jira, naimacina duenaite. <sup>17</sup> Jusiñamuidi bie

isoide rafuena Faraón micorimo llote. Moisés micori illa facaise Egipto railla enirue illaimadi Faraón micori. Naimiemo llote: “Ona illaimana jai itataticue. O uicomo siño rafuena finodicue, cue uai siñonana jiaie comini uiñollena, nana cominido cue mameci sorillena”.

<sup>18</sup> Jusiñamui iese ite. Naimie dinena ie jitaillanona duenaite. Naimie jitailla jira, jiaie cominina naimiema ñnotañede.

<sup>19</sup> Nibai comeciaina facadomoi: “Cominina iese Jusiñamui itataia, ¿bue ñellena naimacina duere finoacade?” <sup>20-21</sup> Iese comeciaina facañeno. ¿Niese nainona naimiemo ducañitomoi? Ero, jiñoramona nogona finodiñaiñodi ie jitailla dierise nogona finode. Dajerie ebirede nogona finode. Dajerie jamai nogona finode. <sup>22</sup> Ie isoide. Nana comini dajena eruaiñedicai. Ie jitailla isoi, jiaiforie Jusiñamui caina comuitate. Jusiñamui ie jitailla rafuena finode. Jeacinona comini finua jira, Jusiñamuidi naimacina duere finoacade. Naimacina ie uai siñonana jiai uiñotaacade; iadedi naimacina nia duere finoñede. <sup>23</sup> Cominina Jusiñamuidi jiai duenailla jira, naimacina ie siño uai ebirenana uiñotaacade. Naimie illanomo nanomona naimaci marena iitimaci. Iese naimie naimacina itatate.

<sup>24</sup> Jusiñamui caina iese itatate. Da judiuaia iese itatañede; ie iadedi judiuaiañedinona jiai iese itatate. <sup>25</sup> Jusiñamui iena jiaie lluana Oseas micori jiaie cuete:

Cue cominiñedinodi cue cominina jaitimaci. Isiruiñeganona isiruiticue.

<sup>26</sup> Dane jiai cuete:

Navui cue cominiñedomoi; iadedi jiaie comini omoina ico lloitimaci: “Naimacidi jaca

cajede cai Jusiñamui ie uruiaidimaci”  
lloitimaci  
cuete. <sup>27</sup> Isaías micori railla lloraima jaie cuete:  
“Monailai fuemo conillie eo ite. Ie isoi Israel  
micori uruiaie eo jebuitimaci; iadedi Jusiñamuidi  
nana naimacina jillobitañeite. Dajeriena jillota-  
janona, <sup>28</sup> jiaínomo ie lloga uaina raire finoite.  
Naimacina duere finoite” cuete. <sup>29</sup> Isaías micori jiaie  
cuete:  
Jusiñamuidi anamo nana ra ite.  
Jusiñamuidi Sodómamo ite comini micoriaina jaie  
cuenode.  
Gomórramo ite comini micoriaina jiaie jaie cuenode.  
Naimaci micoriaie isoi iñedicaie, nana caie cominina  
naimiedie duere finoñena jira.

*Judíuaidi Cristo rafuena jitañedimaci*

<sup>30</sup> Biemo comeciaina faca. Judíuainedínodi  
Jusiñamui jitailla isoi, marena illana navui  
uiñoiacaiñedimaci; iadedi iena jai uiñotimaci.  
Jesucristona naimaci inuamona, marena illana  
jai uiñotimaci. <sup>31</sup> Jusiñamui jitailla isoi marena  
naimaci illena, judíuaidi Moisés micori llogacinodo  
jaidimaci; iadedi Moisés micori llogacinona  
naimaci raise inoñena jira, marena illana jaca  
uiñoñedimaci. <sup>32</sup> Naimaci finoca rafuemonona  
marena iacadimaci. Marena naimaci illena,  
Jesucristona inoiacaiñedimaci. Naimie muidona  
marena iñeitimaci. <sup>33</sup> Isaías micori iena jaie cuete:  
Jusiñamui llote: “Ero, Jerusalémo cue Jitona ore-  
taiticue.  
Naimie muidona cominidi jilloñeitimaci.  
Naimiena naimaci inoñenia, faifitimaci;  
iadedi naimiena inotinodi tainona inoñeitimaci.  
Subicaiñeitimaci” llote.

# 10

<sup>1</sup> Cue amatiaí, judíuaí comini jilluana eo jitaídícue. Jusiñamui diga cue ñaia, iena jicadícue. <sup>2</sup> Jusiñamui jitaillacinona eo finoacadimaci. Iena uiñotícue. Iena finoacadimaci; iadedi iena finuana raise uiñoñedimaci. <sup>3</sup> Jusiñamui naimacina marena itatallena uiñoñedimaci. Naimaci finoca rafuemona marena iacadimaci. Jusiñamui llua isoi jaiacaiñedimaci. <sup>4</sup> Nana Cristona ñnotimiedi Moisés micorí llogacinodo naimie marena illena jai jaiñede. Cristona ñnuamona, Jusiñamui jitailla isoi, naimie marena jai ite.

<sup>5</sup> Moisés micorí jaie cuete: “Naimie marena illena, cue lluado jaidimiedi jaca iite, cue lluana naimie raise ñnoia” cuete. <sup>6</sup> Iese jaie cuete; iadedi jaca buna iese ñnoñede. Cristona ñnuamona, marena Jusiñamui jitailla isoi, birui iticai. Jusiñamui uai llote: “Omoi comeciaina facañeno: ‘Cristona cai baillena, naimiena bene cai atillena, monamo jaiticai. <sup>7</sup> Fiodaitino dine jaiticai, Cristona cai jillotallena’. Iese comeciaina facañeno” llote. Cristodi eniruemo jaie bite. Fiodaite; ia naiemona jai jillode. <sup>8</sup> Jusiñamui uai llote: “Naie rafue cai dine jai ite. Iena jai uiñotícai”. Cai jilloillena Cristona cai ñnuana birui lloticai. <sup>9</sup> Jaie cominimo: “Cristodi cai Nama” omoi lloia, Cristo fiodaillamona Jusiñamui naimie jillotajana omoi ñnoia, jilloitomoí. <sup>10</sup> Cai comecimona cai ñnua jira, Jusiñamui caina marena illana itataite. “Cristodi cai Nama” cai lloia, Jusiñamui caina jillotaite.

<sup>11</sup> Isaías micorí iena jaie cuete: “Cristona ñnotinodi tainona ñnoñeitimaci. Suubi-



cañeitimaci” cuega. <sup>12</sup> Naie rafuedi nana cominina ñaite. Judíuaina ñaite. Judíuaiñedinona jiai ñaite. Jusiñamui anamo nana cominidi itimaci. Nana naimiemo jicanotinona jaca duenaite. <sup>13</sup> Cristodi naga naimiemo jicanotimiena jillotaite; <sup>14</sup> iadedi Cristona naimaci nia ñnoñenia, naimiemo jicanonidimaci. Cristo naimaci facaina fiodailla rafuena naimaci nia cacaiñenia, naimiena ñnonidimaci. Naimacimo naie rafuena jiaie comini lloñenia, iena cacaiñeitimaci. <sup>15</sup> Jusiñamui ie rafue llorainina jai orede. Isaías micori iena jaie cuete: “Mare rafuena llotino cai ñine billano, eo iobidicai” cuete.

<sup>16</sup> Iese cuete; iadedi ailluena comini naie rafuena nia jitañedimaci. Isaías micori iena jiai jaie cuete: “Jusiñamui, ailluena comini cai lluana ñnoiacañedimaci” cuete. <sup>17</sup> Cai llumona Cristo rafuena cacadimaci. Cristo rafuena cacajamona, damierie naimiena ñnotimaci.

<sup>18</sup> Judíuai comini naie rafuena jai cacadimaci. Jusiñamui facaina lloraíma micori iena jaie cuete: Naga eniruemo ite cominimo Jusiñamui lloraini micoriaidi naie rafuena jai llotimaci cuete. <sup>19</sup> Judíuai comini naie rafuena cacadimaci; iadedi iena ñnoñedimaci. Moisés micori iena jaie cuete:

Jusiñamuidi llote: “Cue rafuena naimaci feiñua jira, judíuaiñedinno diga uradoitomoí.  
‘Naimaci abina uiñoñedimaci’ raitomoí;  
iadedi cue rafuena naimaci feiñua jira, naimaci diga iciritomoí” llote.

<sup>20</sup> Isaías micori marefodo jiai cuete: Jusiñamui llote: “Cuena jenoñedinno cuena jai baitimaci.

Naimacina cue jilloitallena cuena jicanoñedinomo jai bairedicue” llote.

<sup>21</sup> Jusiñamui judíuai cominina jiai llote: “Naimacina cue dine jaca uaidoticue; iadedi ñnoiacañedinomaci. Cuena jitaiñedinomaci” llote.

## 11

### *Judíuai cominimona dajerie ñnoitimaci*

<sup>1</sup> Jusiñamuidi judíuaina fañonocailamo omoi comeaiña facañeno. Judío imiedicue. Abraham uruiai micoriaimona comuidicue. Benjamín railla nairai imiedicue. <sup>2</sup> Naimacina jaie naimie fetua jira, Jusiñamui judíuaina fañonocaiñede. Elíamo jaie ite rafuena uiñotomoi. Jusiñamuimo naimiedi judíuaina llote: <sup>3</sup> “Cue Nama, o facaina lloraini micoriaina meinetimaci. Ona cai sedajanona judaidimaci. Dama cue fiebidicue. Cuena jiai meineiacadimaci”. <sup>4</sup> Jusiñamui dinena uai ote: “Dama iñedio. Siete mil iñiaí cue dibeimo nia eenoticue. Baal railla jiraraina jaca sedañedinomaci. Cuena nia sedadimaci” llote. <sup>5</sup> Birui ie isoide. Naimacina duenaillamona, naimacina Jusiñamui fetua jira, dajerie Jusiñamui dibeimo itimaci. <sup>6</sup> Naimacina duenaillamona, naimacina fetode. Naimaci finoca rafue muidona naimacina fetoñede. Naimaci finoca rafue muidona naimacina fetodena, naimacina duenaillamona naimacina fetoñede.

<sup>7</sup> Ie jira iena iese lloiticue. Ailluena judíuaidi marena Jusiñamui jitailla isoi illana oñedinomaci; iadedi Jusiñamui fetocano iena otimaci. Ailluena comini iena ñnoiacañedinomaci. <sup>8</sup> Jusiñamui facaina lloraini micoriai iena jaie ciega: “Jusiñamuidi

naimacina abina uiñotañede. Jusiñamui fino ca rana naimaci cioia, iena uiñoñeditimaci. Jusiñamui rafuena naimaci cacajia, iena cacaiñeditimaci. Birui iese nia itimaci” cuega. <sup>9</sup> David micori iena jiaí llote:

Naimacimo aillue ra illamona, Jusiñamui naimacina duere finoite.

<sup>10</sup> Naimaci comeciaí Jusiñamui rafuena uiñoñeitimaci.

Naimaci fino ca rafue anamo duere sefuicana jaca jaitimaci.

*Judíuaiñedinomona dajerie ñnoitimaci*

<sup>11</sup> Naimie rafuena judíuai comini jitaíñena jira, Jusiñamui naimacina duere finode; iadedi naimacina sofeñede. Jusiñamuina judíuai ñnoñena jira, Jusiñamuidi judíuaiñedinona jai jillotate. Naimacina jai jillotate, judíuai ñnena judíuaiñedinona uradoillena. Uradoillamona Jusiñamuidi naimaci naimiena ñnollena jitaide. <sup>12</sup> Cristona judíuai jitaíñena jira, Jusiñamuimona judíuaiñedinodi diga marecinona birui feiñotimaci. Cristo ñibeimo íco judíuai ia, Jusiñamuimona judíuaiñedinono ailluena feiñoitimaci.

<sup>13</sup> Judíuaiñedinono, omoimo rafuena lloiacadicue. Omoí ñne Jusiñamuidi cuena orede. Cue maijari eo marena ññaticue, <sup>14</sup> cue comini cuena uradoillena, Cristona dajerie ñnotallena.

<sup>15</sup> Cristona naimaci ñia ñnoñena jira, judíuaiñedinono jai ñnotimaci. Cristona íco judíuai ñnoia, Jusiñamui diga jaca iitimaci. <sup>16</sup> Janore jisa juilliruñu marenia, nana juilliruidi mare. Riara ie jainauai marenia, nana ie igailai mare. Judíuidi ie isoidimaci.

Naimaci jaiagai micoriai jainauai isoidimaci. Naimaci jaiagai marenia, naimacidi jiai mare. Birui ite judíuaidi igaillai isoidimaci.

<sup>17</sup> Taide igaillai ie amenamo jai duiñede. Ie isoidimaci. Naimacimona Cristona jiaino ñnoñena jira, Cristomo jai duiñedimaci. Sotaca riarra isoi, naimaci ifomo itomoi. Ie jira Jusiñamuimona rafuena jai feiñocabitomoi. <sup>18</sup> Naimaci ifomo omoi illa jira, abina uradoiñeno. Igailaimona jainao cajellena, ie ijina oñede; iadedi iemo duilla jira, jainaomona igaillai cajellena, ie ijina ote. Ie isoide. Naimiemo omoi duilla jira, Jusiñamuimona rafuena jai feiñocabitomoi.

<sup>19</sup> Comeciaina facadomoi: “Taide igaillai ifomo iticai isoidicai. Jusiñamui judíuaina oni dotade, caina fetollena”. <sup>20</sup> Uanaicinona comeciaina facadomoi. Naimaci ñnoñena jira, Jusiñamuidi naimacina oni dotade. Omoi ñnua jira, naimaci ifomo itomoi. Ie jira abina uradoiñeno; iadedi Jusiñamuina omoi jacirui. <sup>21</sup> Naimiena naimaci ñnoñena jira, judíuaina duere finode. Naimiena omoi ñnoñenia, daje isoi omoina duere finoite. <sup>22</sup> Biemo comeciaina faca. Naimiena ñnoñedinona jai duere finode; iadedi omoina duenaite. Naimiena ñnocana omoi jaia, naimie omoina nia duenaite. Iese omoi jaiñenia, naimie omoina dotaite. <sup>23</sup> Judíuai Cristona ñnoñeno navui jaidimaci: iadedi Cristona naimaci birui ñnoia, naimie dibeimo Jusiñamui naimacina itatarede, igai riaramo sotaja isoi. <sup>24</sup> Ailli riarana cueticue. Naie amenamo nano duiñedomoi. Judíuai nainomo nano duidimaci. Jusiñamui jitailla jira, sotaca igai isoi, naimaci ifomo omoina jai itatate. Ie jira

Jusiñamui jitaia, nainomo nano naimaci duilla jira, naimiedi judúuaina abido oite.

*Eo ailluena judúuai jilloitimaci*

<sup>25</sup> Bie rafuena omoi uiñuana jitaídícue. Iena navui uiñoñedícai. “Judúuai baifemo faitícai” omoi raiñellena, buena omoimo llotícue. Díga judúuai Cristona birui ñnoiacaíñedímaci. Jusiñamui jitailla díese judúuaiñedíno jillua facaisena, iese iitimaci.

<sup>26</sup> Ie mei eo ailluena judúuai jilloitimaci. Jusiñamui facaina lloraini micoriai iena cuetimaci: Jerusalémona cai jilloitaraíma biite.

Jacob micori uruiaímona jeacínona dotaite.

<sup>27</sup> Naimaci jeacínona oni dotajanona, Jusiñamui jaie lloga uai suite.

<sup>28</sup> Cristona birui ñnoiacaíñedímaci. Jusiñamuina enoídímaci. Jusiñamuina naimaci jitaíñena jira, naimie omoína fetode. Ie jira jillodomoí; iadedí Jusiñamuidí judúuaina nano jaie fetode. Naimaci jaiagai micoriaímo ie lloga uaina jira, naimacína nia isiruite. <sup>29</sup> Jusiñamui ie lloga uaina saiñede. Naimacína fetua jira, naimacína faínonocaiñeite. <sup>30</sup> Jusiñamuina navui ñnoñedomoí; iadedí Jusiñamuina naimaci ñnoñena jira, Jusiñamui omoína jai duenaite.

<sup>31</sup> Jusiñamuina jai ñnoñedímaci; iadedí omoína naimie duenailla isoi, Jusiñamuidí naimacína íco jiaí duenaite. <sup>32</sup> Jusiñamui nana comínina naimíena ñnoñenana uiñotade, naimacína naimie duenaillena. <sup>33</sup> Jusiñamui caina eo duenaite. Eo abína uiñote. Naga rana uiñote; ie iadedí naimie lloga uaina raise cacaiñedícai. Naimie finoca rafuena raise jiaí uiñoñedícai. <sup>34</sup> Jusiñamui facaina

lloraïma micorï iena jaie cuete: “Jaca buna cai Nama Jusiñamui começi facajacinona uiñoñede. Jaca buna naimïemo ie finoca rafuena lloñede. <sup>35</sup> Jiaïruido ibana feiñollena, jaca buna naimïemo rana fecañede” cuete. <sup>36</sup> Naga ra naimïemo illa jira, naga ra naimïemona bite. Naga rana finode. Naimïemo iobillacinona cai fecacabillasa. Iena jitaïdicue.

## 12

### *Jusiñamui anamo raise omoï i*

<sup>1</sup> Cue amatiaï, omoïmo bie rafuena lloiticue. Jusiñamui caïna duenailla jira, omoï jeanide começiaïmona, naimïe jitaïlle rafuena omoï finuamona naimïe anamo raise omoï i. Naimïe jitaïlla isoi omoï i. Naimïedi omoï iese illana gaïde. Omoï começiaïmona naimïena raise omoï seda. <sup>2</sup> Cristona uiñoñedïno isoi omoï iñeno; iadedï omoï começiaï iuaina meiduanona, jiaïe rafuedo mai omoï jai. Ie mei Jusiñamui jitaïlla rafuena finuana uiñoïtomoi. Mare rafuena finuana uiñoïtomoi. Naimïena iobitajacinona jiaï uiñoïtomoi. Eo mare rafuedo jaïllana uiñoïtomoi.

<sup>3</sup> Jusiñamui cuena duenaïllamona, bie rafuena omoïmo cue lloïllena, naimïe uai cuemo ite. “Jiaïe comini baïfemo faiticue” raïllamo o começina fa-cañeno; iadedï: “Nie isoidimïedicue” o raïllamo o começina raise faca. Jusiñamuïmona o feiñoğa ðiese ñnuacinomo o começina faca. <sup>4</sup> Nagamïe ie abïmo ðïga ra ite. Ie onollï ite. Ie uisï ite. Ie jebe ite. ðïga jiaïe ra ite. Rana cai finollena, naga ra cai abïmo ite. Cai abïmo jainaïaïde. <sup>5</sup> Ie isoïde. Cristona jai

ñnoticai. Aillosiedicai; iadedi daajena naimiemo jainaiaidicai. Dani caimo jiai jainaiaidicai.

<sup>6</sup> Jusiñamuidi daje isoide uaina naimie dibeimo cai maijillena, caimo fecañede. Ie jitailla diese caimo fecade. Ie jira omoi feiñoga uaido naimie facaina maiji. Rafuena omoimo Jusiñamui lloia, iena raise llono. Roracomo omoi maijillena Jusiñamui lloia, nainomo raise maiji. Omoi llofuellena Jusiñamui lloia, naimie rafuena raise llofue. <sup>7</sup> Roracomo maijiacinona uiñotimiedi nainomo raise maijia. Llofuiacinona uiñotimiedi raise llofua. <sup>8</sup> Comeci ocuiñotajacinona uiñotimiedi comini comeciaina ocuiñotacana jailla. Rana fecajacinona uiñotimiedi rana caidiñeno fecaja. Cominina sedajacinona uiñotimiedi cominina raise sedaja. Dueredinona canodimiedi dueredinona iocire canua. Cristomo daajena cai jainaiaillamona, iese coninina canocana jaiticai.

### *Cristo rafuedo cai jailla*

<sup>9</sup> Omoi comeciaimona nana cominina isirui. Maraiñedinona gaiñeno; iadedi mare rafuedo omoi jai. <sup>10</sup> Coninina isirui, omoi cominina omoi isiruilla isoi. Omoina jiaimie nia iobitañenia, naimiena raire omoi iobita.

<sup>11</sup> Cristo rafuena sefuiruiñeno finocana omoi jai. Cai Namana iocire seda.

<sup>12</sup> Naimie dine omoi illemo iocire omoi ocuiri. Duere omoi sefua, omoi comeciaina ocuiño. Jusiñamui diga ñaicabillanona omoi jai.

<sup>13</sup> Jiaie creyentiai rania, naimacina cano. Omoi jofuemo creyentiai ria, naimacina nafue.

14 Jusiñamui dibeimo naimaci marena illena, omoïna duere finodinona Jusiñamuimo jii. Naimaciri marena ñaino. Naimacina faidoñeno.

15 Iobidino diga omoï nabairillena, omoï iobi. Sunaitino diga omoï nabairillena jiaï omoï sunai.

16 Daje isoi omoï comeciï lloillamona uri omoï i. Abina birioicaiñeno. Jamai bue isoidino diga nabairi. “Jiaïe comini baifemo uiñoticaï” raiñeno.

17 Jiaïe comini omoïna jeare finoia, naimacina daje isoi jeare finoñeno. Ibana oñeno. Omoï marena illana jiaïe comini uiñollena, marena omoï i. 18 Omoïmona rafuena suiñoñeno. Nana comini diga uri omoï i. 19 Cue isiruigano, bu omoïna jeare finoia, ibana oñeno. Jusiñamui naimacina duere finoite. Moisés micori iena jaie cuete: “Cai Nama llote: ‘Cominina duere finodicue. Ibana oiticue’ ” cuete. 20 Ibana oñeno. Jusiñamui facaina lloraima iena jaie jiaï cueda: “Omoï enoigamie aimetaia, naimiena eca. Naimie jiroiacania, naimiena jirote”. Ie mei naimie meire omoïmo eruaite. 21 Jiaïe comini omoïna jeare finoia, iciriñeno; iadedi naimacimo mare rafuena fino. Iese omoï finoia, naimacina omoï dibeimo itataitomoï.

## 13

1 Nana illaïcominina naimaci ifomo Jusiñamuidi itataja jira, illaïcomini lloga uaina nana cai inua.

2 Illaïcomini uaina bu inoñenia, Jusiñamuina jiaï inoñede. Ie mei Jusiñamui naimiena duere finoite. 3 Mare rafuena finodinodi illaïcominina jaciruiñedimaci; iadedi marañede rafuena finodino naimacina jaciruitimaci. Omoïna duere finoñellena, mare rafuena finocana omoï jai. Iese omoï jaia, omoïna marena ñaitimaci. 4 Jusiñamui



facaina omoïna canodimaci. Maraiñede rafuena omoï finoia, naimacina jacirui. Omoïna duere finollena, naimacimo uai ite. Maraiñede rafuena finodimiena Jusiñamui facaina duere finoitimaci.

<sup>5</sup> Ie jira naimaci uaina ñno, Jusiñamuimona omoï duere sefuiñellena. Omoïna: “Mare” jiaï raitimaci.

<sup>6</sup> Gobierno omoïna ibataia, Jusiñamui facaina naimaci maijia jira, iena iba. Naimaci raise maijillena, iena iba.

<sup>7</sup> Gobierno omoïna ibataia, iena iba. Illaïcominimo iobillacinona feca. <sup>8</sup> Ra omoï oia, ibaño jaiño; iadedi coninina omoï isirui. Jiaïe cominina isiruitimiedi nana Jusiñamui lloga uaina jai finode.

<sup>9</sup> Moisés micori diga lletarafuena jiaïe cuete: “O aiñede riño diga iño. O iniñede ñima diga iño. Jiaïmiena meineño. Rana fñño. Jiaïmïemo ite rana nicidoño” cuete. Jiaï lletarafue ite: “Dani omoï abiaïna omoï isiruilla isoi, jiaïe cominina omoï isiruilla”. Bie lletarafuena omoï ñnoia, nana lletarafuena jai ñnotomoi.

<sup>10</sup> Jiaïe cominina omoï isiruia, naimacina jeare jai finoñedomoi. Jiaïe cominina omoï isiruia, nana Jusiñamui lloga uaina jai ñnotomoi.

<sup>11</sup> Iena birui cai finua. Jesucristo billiruidi iaïrei jai ite. Naimïena cai nano ñnua facaiseconi, naimïe billiruimo cai comeciaina facadicaï; iadedi nagarui naimïe billirui iaïrei iñoicaide.

<sup>12</sup> Jesucristo nia dane biñena jira, eniruemo cai illa jira, jitreñonomo iticaï isoidicaï. Naimïe bia, naimïe diga cai illemona, useredonomo raïre ja iiticaï isoiticaï. Ie jira jeacinona finocana cai jaïllana mai cai faïnonocaili. Jesucristo rafue

anamo raise cai illesa. <sup>13</sup> Cai marena illana nana comini uinollena, mare rafuena finocana cai jailla. Jearede rafuena cai finoñena. Cai jifaiñena. Cai aiñede riño diga cai iñena. Cai furiñena. Cai abina uradoiñena. <sup>14</sup> Iese cai iñena; iadedi naimie caina namatallena, cai Nama Jesucristona raise cai nabailli. Cai jearede navui jitaillacinona finoacanamo cai comeciaina facañena.

## 14

### *Jiaie creyentena jeare ñaiñeno*

<sup>1</sup> Cristona inotimiena omoi dine biade, naimiena raise feiño. Naimie Cristona nia raise inoñenia, naimiena nafue; iadedi omoi isoi naimie inoñenia, conima uina caitañeno. <sup>2</sup> Dajerie naga rana gutimaci; iadedi jiaimie difai guiga rana guite. Naimie riñede. Ie comeciina facade: “Cue riia, jeacinona jai finoiticue”. <sup>3</sup> Naga rana guiñedimiena miñeno. Naga rana gutimiena miñeno. Jusiñamuidi naimacina jai feiñote. Ie jira miñeno. <sup>4</sup> Omoi facaina maijiñedimaci. Jusiñamui facaina maijidimaci. Jeacinona naimaci finoia, Jusiñamui naimacina duere finoite. Jeacinona finoi raillanona, Jusiñamuidi naimacina canoite.

<sup>5</sup> Dajerie creyentiai comeciaina facadimaci: “Judíuai rafue finuaruillai Jesuñamuina sedajiticaí, nairuillai jiaruillai baifemo uaila jira”. Jiaino raitimaci: “Nagarui daje isoide” raitimaci. Nagamie ie comeciina raise facajamona, <sup>6</sup> cai Namana iobitallena, nagamie ie jitaillaruimo cai Namana sedaite. Naga rana gutimie iobillacinona Jusiñamuimo fecajano, cai Namana

iobitate. Naga rana guiñedimie iobillacinona Jusiñamuimo fecajano, cai Namana jiaí iobitate.

<sup>7</sup> Cristomo cai duilla jira, daní cai jitailla rafuena finonidicai. Cai fiodailliruina jiaí llonidicai.

<sup>8</sup> Naimiedi cai finolle rafuena ocuide. Cai fiodailliruina jiaí lloite. Naimiemo cai duilla jira, iese iticai. <sup>9</sup> Cristodi fiodaite. Ie mei jillode. Ie jira naimie anamo iticai. Cai cajenia, naimie anamo iticai. Cai fiodaia, naimie anamo jiaí iiticai.

<sup>10</sup> Naimie baífemo omoi iñena jira, jiaie creyentena miñeno. Naimie uaina caitaño. Naimiedi Cristo díbeimo ite. Jusiñamui uicomo nana ico iiticai. Jusiñamuidi marañedínona duere finoite. Maredínona duere finoñeite. <sup>11</sup> Isaías micorí jaie iena cuete:

Jusiñamuidi llote:  
 “Cue jaca illa jira, nana cominí cue uicomo cuena sedajanona, cuemo iobillacinona fecaitimaci” llote.

<sup>12</sup> Nainomo Jusiñamuimo nana cai finouiga rafuena lloiticai. Ie jira jiaie creyentiaí diga marena omoi i.

*Jiaie creyentena jeacino fínoi raillano, mare rafuedo cai jailla*

<sup>13</sup> Ie jira jiaie cominina cai miñena; iadedi mare rafuedo cai jailla. Jiaimiena jeacnona cai finotai raillano, mare rafuedo cai jailla.

<sup>14</sup> Cai Nama Jesúsimo cue duilla jira, naga ríga radi cuemona mare. Iena raise uiñoticue. Iena cue ríia, jeacnona finoñedicue. Iena uiñoticue; iadedi jiaimie comecina facade: “Biena cue ríia, jeacnona jai finodicue”. Naimie comecina iese facajamona, iena naimie ríia, naimiemon

jeacinona jai finode. <sup>15</sup> O riga ra muidona jiaie creyente comeci maraiñeno jaia, naimiena jai isiruiñedio. Cristo naimieri fiodaite. Ie jira naie isoide rana riñeno, naimiena Jusiñamuina fainonocaitañellena. <sup>16</sup> Ie jira o jitailla rana finoñeno. Jiaie comini ona miñellena, naie rana riñeno. <sup>17</sup> Jusiñamui cominina cai illamona, cai guille ramo cai comeciaina cai eo facañena; iadedi marena cai illamo cai comeciaina cai facaja. Uri cai illamo cai comeciaina jiai cai facaja. Iocire cai illamo cai comeciaina jiai cai facaja. Jusiñamui Joreño caimo illa jira, iese caina itataite. <sup>18</sup> Iese cai jaia, Cristona raise sedadica. Jusiñamuina iobitadica. Jiaie comini caina marena jiai ñaitimaci.

<sup>19</sup> Ie jira uri icana cai jailla. Dani cai comeciaina ocuiñocana cai jailla. <sup>20</sup> Omoi riacaga ra muidona, jiaie cominina Jusiñamuina fainonocaitañeno. Naga radi mare, rillena; iadedi bue isoide omoi ria muidona, jiaimie Jusiñamuina fainonocai, jeacinona jai finodomo. <sup>21</sup> Bue isoide omoi ria muidona, jiaimie jeacino finoi raillanona, iena riñeno. Bue isoide omoi jirua muidona, jiaimie jeacino finoi raillanona, iena jiroñeno. Bue isoide omoi finua muidona, jiaimie jeacino finoi raillanona, ie isoide omoi finoñeno. Naimiedi Cristomo jai duide. <sup>22</sup> Mare ra omoi finoa, omoi comeciaimona iena uiñotomo. Jusiñamuidi omoi comeciaina uiñua jira, iena marefodo lloñeno. Omoi comeciaimona jeacinona omoi finoñenana uiñotomo. Ie jira iocire itomo. <sup>23</sup> “Ñie isoide ra cue rria, jeacinona finodicue” raillanomo bu iese comecina facaia, iena naimie riñena. Iena naimie

riia, Cristona naimie raise #noñena jira, jeacinona jai finode. Jiaimiena jeacinona cai finotai raillano, mare rafuedo cai jailla.

## 15

### *Jiaie creyentena cai canua*

<sup>1</sup> Cristo rafuedo raise jaidicai; iadedi jiaino Cristo rafuedo cai isoi nia jaiñedimaci. Naimacina cai canua. Ie jira dani cai jitailla rafuena finoñeticai; <sup>2</sup> iadedi Cristo rafuedo naimaci raise jaillena, jiaie cominimo cai comeciaina cai facaja, naimacina cai canollena. <sup>3</sup> Eniruemo navui naimie ia, Cristo ie jitailla rafuena jiai finoñede; iadedi Jusiñamui jitailla rafuena finode. Naimiedi duere sefuide. Jusiñamui facaina lloraima micori Cristo ñaiana jiai cuete: “Jusiñamuina jeare ñaiacadimacimo, cuena jiai jeare ñaitimaci” cuete. <sup>4</sup> Naiemona cai fueollena, naiemona cai comeciiai ocuiñotallena, Jusiñamuina jaiie ciegafuiaidi caimo ite. Naiemona Jusiñamui illanomo cai illemo ocuridicai. <sup>5</sup> Jusiñamui cai comeciaina ocuiñotade. Naimie coniniri omoina uri itatajana jitaidicue. Cristo Jesús llua isoi, omoi uri illana jitaidicue, <sup>6</sup> daje isoi omoi comeciiai lloillamona, Jusiñamuina omoi iobitallena. Cai Nama Jesucristo Moona Jusiñamui illamona, Jusiñamuina omoi iobitajana jitaidicue.

### *Judúaiñedinodi Cristo rafuena jiai cacadimaci*

<sup>7</sup> Jiaie illanomona creyente omoi roracomo bia, Cristo caina feiñua isoi, Jusiñamuina iobitallena, naimiena raise omoi feiño. <sup>8</sup> Iena nia lloiticue.

Judíuaina canollena, Jusiñamui lloga uaina fuidol-  
lena, Cristodi bite. Jusiñamui tainona lloñede.  
Jusiñamui naimaci jaiagai micoriaimo ico suille  
rafuena jaie llote. Eniruemo billanona, Cristo iena  
fuiduaibite. <sup>9</sup> Judíuaiñedino Jusiñamuina iobital-  
lena, Jusiñamui naimacina duenaila jira, Cristodi  
bite. David micori Cristo llwana jaie cuete:

Judíuaiñedino motomo cue illmona ona  
iobitaitimaci.

Ruamona cue muidona ona jiai iobitaitimaci.

<sup>10</sup> Moisés micori jiai cuete:

Judíuaiñedino, Jusiñamuimo duide comini diga iobi.

<sup>11</sup> David micori jiai cuete:

Nana judíuaiñedino, Jusiñamuimo iobillacinona  
feca.

Nana comini naimiemo iobillacinona fecacabil-  
lasa.

<sup>12</sup> Isaías micori cuete:

Isaí micori uruiaimona damie comuitajamona,  
naimiedi judíuaiñedinona sedaite.

Naimie naimacina jillobitallena, naimiemo  
ocuiritimaci.

<sup>13</sup> Jusiñamui iemo omoina ocuiritate. Naimiena  
omoi inuanona, naimie omoina caimare itatajana  
jitaidicue. Uri itatajana jiai jitaidicue. Iemei  
Jusiñamui Joreño naimie siño uai diga omoi jillu-  
amo omoina ocuiritaite.

<sup>14</sup> Cue amatiai, omoina uiñoticue. Eo  
maredomoi. Cue lloga rafuena eo uiñotomoi.  
Coninina llofueredomoi.

<sup>15</sup> Iena omoi  
comecillena, dafuerie rafuena omoimo marefodo  
cueticue. Jusiñamui cuena fetuanona, ie rafuena  
cue llollena, cuena orede. <sup>16</sup> Judíuaiñedinomo  
Jusiñamui ie mare rafuena cue llollena, Cristo

Jesús facaina maijidicue. Jusiñamui dibeimo naimacina cue itatajanona, Jusiñamui naimacina feiñollena, naimacimo lloticue. Jusiñamui Joreñodi naimacina jiai maretate.

<sup>17</sup> Jusiñamui dibeimo cue maijia jira, Cristo Jesús muidona cue maijari iobidicue. <sup>18</sup> Cue maijiana marefodo lloiticue. Judíuaiñedinona Jusiñamuina ñnotallena, Cristodi cuena canode. Cue llua cacadimaci. Cue illana ciodimaci. <sup>19</sup> Cristodi cuena siño rafuena finotate. Jusiñamui Joreño uaido cuena finotate. Iemei Cristona jai ñnotimaci. Jerusalémona Ilírico railla enirue dinomo Cristo ie mare rafuena ailluena cominimo raise jai lloticue. <sup>20</sup> Nainomo Cristona nia uiñoñedino dine navui cue jaiacana jira, nainomo Cristo rafuena lluaidicue. Jai cacadino illanomo cue jaiacaiñena jira, nainomo lluaiñedicue. <sup>21</sup> Isaías micori buena jai e cuete: Cristo rafuena nia cacaiñedinodi iena cacaitimaci. Naimiēna uiñoitimaci cuete.

### *Romamo Pablo jaiacade*

<sup>22</sup> Nainomo cue maijiaacana jira, Romamo omoi dine nia jaiñedicue. <sup>23</sup> Diga nairaimo Cristo rafuena bene jai cue llua jira, cue maijille bene jai iñede. Diga años omoi dine cue jaiacana jira. <sup>24</sup> Españamo cue jaia, omoi dine jaiticue. Omoi diga nano nigarui caimare ñaiticue. Iemei Españamo cue jaillena, cuena canoitomoi. <sup>25</sup> Omoi dine jaiticue; iadedi Jerusalémo ite creyentiaina cue canollena, nainomo nano jaiticue. <sup>26</sup> Macedoniamoi ite creyentiaidi ucubena ofititimaci. Acayamo ite creyentiaidi ucubena jiai

ofitacimaci. Jerusalémo ite duerede creyentiaina canoacadimaci. Jerusalémo ite creyentiaina canollena, iena birui uiticue. <sup>27</sup> Iena feaacadimaci. Judíuainfedimaci; iadedi judíuaina canoacadimaci, naimacimo Cristo rafuena navui judíuaillua jira. Ie jira naimacina birui canodimaci. <sup>28</sup> Naimacimo bie ucubena raise cue fecaja mei, Españamo cue jaillemona, omoi dine nano jaiticue. <sup>29</sup> Omoi dine cue ria, naimie rafuena cue lollena, Cristo cuena raise canoite.

<sup>30</sup> Cue amatiai, cai Nama Jesucristomo omoi duilla muidona, Jusiñamui Joreño coniniña omoiina isiruitaja muidona, Jusiñamuimo omoi jiiia, cue facaina jiai omoi jii. <sup>31</sup> Judeamo ite creyenteñedinomona cue jillobillena, Jerusalémo ite creyentiaimo cue feaacalle ucubena naimaci raise feiñollena, cue facaina omoi jii. <sup>32</sup> Jusiñamui jitailla isoi omoi dine iocire cue rillena, iese omoi jii. Iemei omoi diga cue illemona, jafaicina oiticue. <sup>33</sup> Jusiñamui omoiina uri itatajana jitaidicue.

## 16

### *Romamo itinomo Pablodi ie uaina orede*

<sup>1</sup> Febe raillañaiño omoi dine jaite. Naiñaiñoona omoi uinuana jitaidicue. Naiñaiñodi creyente. Cencrea railla nairai iñaiño. Cristo dibeimo maijiano, nainomo ite creyentiaina canocabide. <sup>2</sup> Cristomo omoi duilla muidona, jiaie creyentiaina cai feiñoiacacabilla isoi, naiñaiñoona raise feiño. Diga cominina naiñaiño canua jira, naiñaiño jitailladie cano. Curna jiai canode.

<sup>3</sup> Priscila dine cue uaina oredicue. Naiñaiño ini Aquila dine cue uaina jiai oredicue. Cristo Jesús



facaina cue diga maijidíiaimaiaí. <sup>4</sup> Cue facaina niadedí fiodaitíiaimaiaí. Ie jira iaímaiaíri iobidícue. Diga nairaimo judíuaíñede creyentíiaí itimaci. Cuetomona Cristo rafuena cacadimaci. Cue facaina iaímaiaí niadedí fiodailla jira, iaímaiaíri jiaí iobidímaci. <sup>5</sup> Iaimaiaí jofomo rollena bitino dine cue uaina oredícue. Epeneto dine cue uaina jiaí oredícue. Cue isiruigamíe. Asia railla eníruemo itinomona naimíedi Cristona nano inotimíe.

<sup>6</sup> María dine cue uaina oredícue. Omoína canollena, omoi motomo maijide. <sup>7</sup> Andrónico dine cue uaina oredícue. Junias dine cue uaina oredícue. Naie iaímaiaídi cue comini. Cárcelmo danomonavui iticai. Jesucristo oretaganodi iaímaiaína marena ñaitimaci. Naimíena nia cue inoñena façaise Cristona inotíiaimaiaí.

<sup>8</sup> Amplias dine cue uaina oredícue. Cristomo naimíe duilla jira, naimíedi cue isiruigamíe. <sup>9</sup> Urbano dine cue uaina oredícue. Cristo facaina cai diga maijicabide. Estaquis dine cue uaina oredícue. Cue isiruigamíe. <sup>10</sup> Apeles dine cue uaina oredícue. Cristomona naimíedi mare rafuedo jaicabide. Aristóbulo jofomo itino dine cue uaina oredícue. <sup>11</sup> Herodión dine cue uaina oredícue. Naimíedi cue comini. Narciso cominimona dajerie inotimaci. Naimaci dine cue uaina oredícue. <sup>12</sup> Trifena dine cue uaina oredícue. Trifosa dine cue uaina oredícue. Cai Nama facaina maijidíiaíñuai. Pérsida dine cue uaina oredícue. Cue isiruigañaiño. Cai Nama facaina eo maijide. <sup>13</sup> Rufo dine cue uaina oredícue. Cai Namana eo raise inote. Naimíe ei dine cue uaina jiaí oredícue. Naiñaiñodi cue ei isoide. <sup>14</sup> Asíncrito dine cue uaina oredícue. Flegonte dine cue uaina oredícue. Hermas dine

cue uaina oredicue. Patrobas dine cue uaina oredicue. Hermes dine cue uaina oredicue. Naimaci illanomo ite creyentiai dine cue uaina oredicue. <sup>15</sup> Filólogo dine cue uaina oredicue. Julia dine cue uaina oredicue. Nereo dine cue uaina oredicue. Naimie miriño dine cue uaina oredicue. Olimpás dine cue uaina oredicue. Nana naimaci illanomo ite creyentiai dine cue uaina oredicue.

<sup>16</sup> Conini caimare omoi uaido. Diga nairaimo creyentiai itimaci. Nana naimacidi omoi dine naimaci uaina oredimaci.

<sup>17</sup> Cue amatiai, daje rafuena nia lloiticue. Omoi comeciai daje isoi lloitañedino diga nabairiño. Uai uaitacabidino diga nabairiño. Omoi jai cacaja rafuena lloñedimaci; iadedi jiaie rafuena llotimaci. Naimaci diga nabairiño. <sup>18</sup> Cai Nama Jesucristo facaina maijiñedimaci; iadedi dani naimaci jitailla rana maijicabidimaci. Mare isoide llumona abina raise uiñoñedinona jifuetimaci. <sup>19</sup> Ailluena cominidi Cristona omoi ñnuana uiñotimaci. Ieri iobidicue. Marecinona finuana raise omoi uiñuana jitaidicue. Marañedicinona omoi finuana jitañedicue. <sup>20</sup> Jusiñamuidi omoina uri itatate. Naimie omoina canoite, Taifena anafetallena. Cai Nama Jesucristo omoina duenaillesa.

<sup>21</sup> Omoi dine Timoteo ie uaina orede. Cue diga jiaí maijicabide. Lucio ie uaina jiaí orede. Jasón ie uaina jiaí orede. Sosípater ie uaina jiaí orede. Naimacidi cue comini.

<sup>22</sup> Terciodicue. Pablo facaina bie cartana omoimo cueticue. Cai Namamo cue duilla jira, omoimo cue uaina oredicue.

<sup>23</sup> Gayodi ie uaina jiai orede. Naimie jofomo ricabidicue. Creyentiaidi naimie jofomo ro-cabitimaci.

<sup>24</sup> Erasto ie uaina orede. Naimiedi bie nairai ie ucube eenoraima. Cuarto ie uaina orede. Naimiedi jiai creyente.

*Jusiñamuimo iobillacinona jaca cai fecajasa*

<sup>25</sup> Cue mare rafue llua isoi, Jusiñamui omoi comeaiaina ocuiñotarede. Jesucristo rafuena llocabiticue. Jusiñamuidi cominimo naie rafuena jaie uiñotañede; <sup>26</sup> iadedi Jusiñamui caina iena birui jai uiñotade. Nana comini iena uiñollena, Jusiñamui facaina lloraini micoriai iena jaie cuetimaci. Jusiñamui llua jira, Cristona comini inollena, nana cominido bie rafuena llocana birui jaide. Jusiñamuidi jaca ite.

<sup>27</sup> Jusiñamuidi naga rana uiñote. Naimiemo Jesucristo mamecido iobillacinona jaca cai fecajasa. Mai. Macaibaite. Pablocicue.

**Jusiñamui uai: Jusiñamui jito rafue illa rabenico**  
**New Testament in Huitoto, Murui (PE:huu:Huitoto,**  
**Murui)**

copyright © 2008 Wycliffe Bible Translators, Inc.

Language: Huitoto, Murui

Translation by: Wycliffe Bible Translators, Inc.

Huitoto, Murui [huu], Peru

**Copyright Information**

© 2008, Bible League International. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

**The New Testament**

in Huitoto, Murui

© 2008, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-25

---

PDF generated using Haiola and XeLaTeX on 3 Mar 2023 from source files  
dated 29 Jan 2022

145a1f66-dca1-5de3-9c00-4e533605e488